

摘藻堂四庫全書薈要

史部

欽定四庫全書薈要

史部

明史卷二百五十九



詳校官兵部主事臣雷純

欽定四庫全書蒼要卷六千八百五十二

史部

明史卷二百五十九

大學士張廷玉等奉 敕修

列傳第一百四十七

楊

鎬

李維翰
周永春

袁應泰

薛國用

熊廷弼

王化貞

袁崇煥

毛文龍

趙光抃

范志完

楊鎬商邱人萬厯八年進士歷知南昌蠡二縣入為御

史坐事調大理評事再遷山東參議分守遼海道嘗偕
大帥董一元雪夜度墨山襲蒙古炒花帳大獲進副使
墾荒田百三十餘頃歲積粟萬八千餘石進參政二十
五年春偕副將李如梅出塞失部將十人士卒百六十
餘人會朝鮮再用兵命免鎬罪擢右僉都御史經畧朝
鮮軍務鎬未至先奏陳十事請令朝鮮官民輸粟得增
秩授官贖罪及鄉吏奴丁免役大氏皆苟且之事又以
朝鮮君臣隱藏儲蓄不餉軍劾奏其罪由是朝鮮多怨

當是時倭將行長清正等已入據南原全州引兵犯全
羅慶尚逼王京銳甚賴沈惟敬就禽鄉導乃絕而朝鮮
兵燹之餘千里蕭條賊掠無所得故但積粟全羅為久
留計而中國兵亦漸集九月朔鎬始抵王京會副將解
生等屢挫賊朝鮮軍亦數有功倭乃退屯蔚山十二月
鎬會總督邢玠提督麻貴議進兵方畧分四萬人為三
協副將高策將中軍李如梅將左李芳春解生將右合
攻蔚山先以少兵嘗賊賊出戰大敗悉奔據島山結三

柵城外以自固。鎬官遼東時，與如梅深相得。及是，遊擊陳寅連破賊二柵。第三柵垂拔矣，鎬以如梅未至，不欲寅功出其上，遽鳴金收軍。賊乃閉城不出，堅守以待援。官兵四面圍之，地泥淖，且時際窮冬，風雪裂膚，士無固志。賊日夜發礮，用藥煮彈，遇者輒死。官兵攻圍十日，不能下。賊知官兵懈，詭乞降以緩之。明年正月二日，行長救兵驟至，鎬大懼，狼狽先奔。諸軍繼之，賊前襲擊死者無算。副將吳惟忠遊擊茅國器斷後，賊乃還輜重多喪。

失是役也謀之經年傾海內全力合朝鮮通國之衆委

棄於一旦舉朝嗟恨鎬既奔挈貴奔趨慶州懼賊乘襲

盡撤兵還王京與總督玠詭以捷聞諸營上軍籍士卒

死亡殆二萬鎬大怒屏不奏止稱百餘人鎬遭父喪詔

奪情視事御史汪先岸嘗劾其他罪閣臣庇之擬旨褒

美旨久不下贊畫主事丁應泰聞鎬敗詣鎬咨後計鎬

示以張位沈一貫手書并所擬未下旨揚揚謂功伐應

泰憤抗疏盡列敗狀言鎬當罪者二十八可羞者十竝

劾位一貫扶同作奸帝震怒欲行法首輔趙志臯營救
乃罷錫令聽勘以天津巡撫萬世德代之已東征事竣
給事中楊應文叙錫功詔許復用三十八年起撫遼東
襲炒花於鎮安破之御史田生金劾其開釁時遼左多
事錫力薦李如梅請復用為大將為給事中麻僖御史
楊州鶴所劾錫疏辨乞休帝不問錫竟引去四十六年
四月我

大清兵起破撫順守將王命印死之遼東巡撫李維翰

趣總兵官張承允往援與副總兵頗廷相等俱戰歿遠
近大震廷議鎬熟諳遼事起兵部右侍郎往經畧既至
申明紀律徵四方兵圖大舉至七月

大清兵由鴉鵲關克清河副將鄒儲賢戰死詔賜鎬尚
方劍得斬總兵以下官乃斬清河逃將陳大道高炫徇
軍中其冬四方援兵大集遂議進師時蚩尤旗長竟天
彗見東方星隕地震識者以為敗徵大學士方從哲兵
部尚書黃嘉善兵科給事中趙興邦等皆以師久餉匱

發紅旗日趣鎬進兵明年正月鎬乃會總督汪可受巡撫周永春巡按陳王庭等定議以二月十有一日誓師二十一日出塞兵分四道總兵官馬林出開原攻北杜松出撫順攻西李如柏從鴉鵲關出趨清河攻南東南則以劉綎出寬奠由涼馬佃搗後而以朝鮮兵助之號大兵四十七萬期三月二日會二道關竝進天大雪兵不前師期洩松欲立首功先期渡渾河進至二道關伏發軍盡覆林統開原兵從三岔口出聞松敗結營自固

大清兵乘高奮擊林不支遂大敗遁去鎬閒急檄止如
柏綏兩軍如柏遂不進綏已深入三百里至深河

大清兵擊之而不動已乃張松旗幟被其衣甲給綏既
入營營中大亂綏力戰死惟如柏軍獲全文武將吏前
後死者三百一十餘人軍士四萬五千八百餘人亡失
馬駝甲仗無算敗書聞京師大震御史楊鶴疏劾之不
報無何開原鐵嶺又相繼失言官交章劾鎬逮下詔獄
論死崇禎二年伏法李維翰睢州人萬厯四十四年以

右副都御史巡撫遼東遼三面受敵無歲不用兵自稅使高淮腋削十餘年軍民益困而先後撫臣皆庸才玩愒苟歲月天子又置萬幾不理邊臣呼籲漠然不聞致遼事大壞及張承允覆沒維翰猶獲善歸至天啟初始下吏論死周永春金鄉人官禮科都給事中齊黨方熾永春與元詩教為之魁尋由太常少卿擢右僉都御史代維翰為巡撫值喪敗之後佐經畧調度軍食拮据勞瘁越二年罷歸天啟初言官追論開原失陷罪遣戍

袁應泰字大來鳳翔人萬厯二十三年進士授臨漳知縣築長堤四十餘里捍禦漳水調繁河內穿太行山引沁水成二十五堰溉田數萬頃鄰邑皆享其利河決朱旺役夫多死者應泰設席為廬飲食作止有度民懽然趨事治行冠兩河遷工部主事歷兵部武選郎中汰遣假冒世職數百人遷淮徐兵備參議山東大饑設粥廠哺流民繕城濬濠修先聖廟饑者盡得食更搜額外稅及漕折馬價數萬金先後發振戶部劾其擅移官廩時

已遷副使遂移疾歸久之起河南右參政以按察使治兵永平遼事方棘應泰練兵繕甲修亭障飭樓櫓關外所需芻茭火藥之屬呼吸立應經畧熊廷弼深賴焉泰昌元年九月擢右僉都御史代周永春巡撫遼東踰月擢兵部右侍郎兼前職代廷弼為經畧而以薛國用為巡撫應泰受事即刑白馬祀神誓以身委遼疏言臣願與遼相終始更願文武諸臣無懷二心與臣相終始有託故謝事者罪無赦熹宗優詔褒答賜尚方劍乃戮貪

將何光先汰大將李光榮以下十餘人遂謀進取撫順
議用兵十八萬大將十人上奏陳方畧應泰歷官精敏
強毅用兵非所長規畫頗疎廷弼在邊持法嚴部伍整
肅應泰以寬矯之多所更易而是時蒙古諸部大饑多
入塞乞食應泰言我不急救則彼必歸敵是益之兵也
乃下令招降於是歸者日衆處之遼瀋二城優其月廩
與民雜居潛行淫掠居民苦之議者言收降過多或陰
為敵用或敵雜間諜其中為內應禍且叵測應泰方自

謂得計將藉以抗

大清兵會三公兒之戰降人為前鋒陣死者二十餘人
應泰遂用以釋羣議明年天啟改元三月十有二日我
大清兵來攻瀋陽總兵官賀世賢尤世功出城力戰敗
還明日降人果內應城遂破二將戰死總兵官陳策童
仲揆等赴援亦戰死應泰乃撤奉集威寧諸軍并力守
遼陽引水注濠沿濠列火器兵環四面守十有九日

大清兵臨城應泰身督總兵官侯世祿李秉誠梁仲善

姜弼朱萬良出城五里迎戰軍敗多死其夕應泰宿營
中不入城明日

大清兵掘城西閘以洩濠水分兵塞城東水口擊敗諸
將兵遂渡濠大呼而進鏖戰良久騎來者益衆諸將兵
俱敗望城奔殺溺死者無算應泰乃入城與巡按御史
張銓等分陴固守諸監司高出牛維曜胡嘉棟及督餉
郎中傅國竝踰城遁人心離沮又明日攻城急應泰督
諸軍列楯大戰又敗薄暮譙樓火

大清兵從小西門入城中大亂民家多啟扉張炬以待
婦女亦盛飾迎門或言降人導之也應泰居城樓知事
不濟太息謂銓曰公無守城責宜急去吾死於此遂佩
劍印自縊死婦弟姚居秀從之僕唐世明憑屍大慟縱
火焚樓死事間贈兵部尚書予祭葬官其一子國用洛
南人歷官山東右參政分守遼海道以右僉都御史代
應泰巡撫遼東應泰死廷議將起廷弼道遠未至乃進
國用兵部右侍郎代應泰為經畧歷官醇謹久於遼日

夜憂戰守備會

大清兵不至得安其位無何請告竟卒於官

熊廷弼字飛百江夏人萬厯二十五年舉鄉試第一明年成進士授保定推官擢御史三十六年巡按遼東巡撫趙輯與總兵官李成梁棄寬奠新疆八百里徙編民六萬家於內地已論功受賞給事中宋一韓論之下廷弼覆勘具得棄地驅民狀劾兩人罪及先任按臣何爾康不揚黨庇疏竟不下時有詔興屯廷弼言遼多曠

土歲於額軍八萬中以三分屯種可得粟百三十萬石
帝優詔褒美命推行於諸邊邊將好搗巢輒生釁端廷
弼言防邊以守為上繕垣建堡有十五利奏行之歲大
旱廷弼行部金州禱城隍神約七日雨不雨毀其廟及
至廣寧踰三日大書白牌封劍使使往斬之未至風雷
大作雨如注遼人以為神在邊數年杜饋遺核軍實按
劾將吏不事姑息風紀大振督學南畿嚴明有聲以杖
死諸生事與巡按御史荆養喬相訐奏養喬投劾去廷

弼亦聽勘歸四十七年楊鎬既喪師廷議以廷弼熟邊
事起大理寺丞兼河南道御史宣慰遼東旋擢兵部右
侍郎兼右僉都御史代鎬經畧未出京開原失廷弼上
言遼左京師肩背河東遼鎮腹心開原又河東根本欲
保遼東則開原必不可棄敵未破開原時北關朝鮮猶
足為腹背患今已破開原北關不敢不服遣一介使朝
鮮不敢不從既無腹背憂必合東西之勢以交攻然則
遼瀋何可守也乞速遣將士備芻糧修器械毋窘臣用

母緩臣期母中格以沮臣氣母旁撓以掣臣肘母獨遺臣以艱危以致悞臣悞遼兼悞國也疏入悉報允且賜尚方劍重其權甫出關鐵嶺復失瀋陽及諸城堡軍民一時盡竄遼陽洶洶廷弼兼程進遇逃者諭令歸斬逃將劉遇節王捷王文鼎以祭死節士誅貪將陳倫劾罷總兵官李如楨以李懷信代督軍士造戰車治火器濬濠繕城為守禦計令嚴法行數月守備大固乃上方畧請集兵十八萬分布靉陽清河撫順柴河三岔兒鎮江

諸要口首尾相應小警自為堵禦大敵互為應援更挑
精悍者為遊徼乘間掠零騎擾耕牧更番迭出使敵疲
於奔命然後相機進剿疏入帝從之廷弼之初抵遼也
令僉事韓原善往撫瀋陽憚不肯行繼命僉事閻鳴泰
至虎皮驛慟哭而返廷弼乃躬自巡歷自虎皮驛抵瀋
陽復乘雪夜赴撫順總兵賀世賢以近敵沮之廷弼曰
冰雪滿地敵不料我來鼓吹入時兵燹後數百里無人
跡廷弼祭諸死事者而哭之遂耀兵奉集相度形勢而

還所至招流移繕守具分置士馬由是人心復固廷弼
身長七尺有膽知兵善左右射自按遼即持守邊議至
是主守禦益堅然性剛負氣好謾罵不為人下物情以
故不甚附明年五月我

大清兵畧地花嶺六月畧王大人屯八月畧蒲河將士
失亡七百餘人諸將世賢等亦有斬獲功而給事中姚
宗文騰謗於朝廷弼遂不安其位宗文者故戶科給事
中丁憂歸還朝欲補官而吏部題請諸疏率數年不下

宗文患之假招徠西部名屬當事薦已疏屢上不得命
宗文計窮致書廷弼令代請廷弼不從宗文由是怨後
黃緣復吏科閱視遼東士馬與廷弼議多不合遼東人
劉國縉先為御史坐大計謫官遼事起廷議用遼人遂
以兵部主事贊畫軍務國縉主募遼人為兵所募萬七
千餘人逃亡過半廷弼聞於朝國縉亦怨廷弼為御史
時與國縉宗文同在言路意氣相得並以排東林攻道
學為事國縉輩以故意望廷弼廷弼不能如前益相失

宗文故出國縉門下兩人益相比而傾廷弼及宗文歸
疏陳遼土日蹙詆廷弼廢羣策而雄獨智且曰軍馬不
訓練將領不部署人心不親附刑威有時窮工作無時
止復鼓其同類攻擊欲必去之御史顧慥首劾廷弼出
關踰年漫無定畫蒲河失守匿不上聞荷戈之士徒供
挑濬尚方之劍逞志作威當是時光宗崩熹宗初立朝
端方多事而封疆議起御史馮三元劾廷弼無謀者八
欺君者三謂不罷遼必不保詔下廷議廷弼憤抗疏極

辨且求罷而御史張修德復劾其破壞遼陽廷弼益憤
再疏自明云遼已轉危為安臣且之生致死遂繳還尚
方劍力求罷斥給事中魏應嘉復劾之朝議允廷弼去
以袁應泰代廷弼乃上疏求勘言遼師覆沒臣始驅羸
卒數千踉蹌出關至杏山而鐵嶺又失廷臣咸謂遼必
亡而今且地方安堵舉朝帖席此非不操練不部署者
所能致也若謂擁兵十萬不能斬將禽王誠臣之罪然
求此於今日亦豈易言令箭催而張帥殞命馬上催而

三路喪師臣何敢復蹈前軌三元應嘉修德等復連章
極論廷弼即請三人往勘帝從之御史吳應奇給事中
楊漣等力言不可乃改命兵科給事中朱童蒙往廷弼
復上疏曰臣蒙恩回籍聽勘行矣但臺省責臣以破壞
之遼遺他人臣不得不一一陳之於上今朝堂議論全
不知兵冬春之際敵以冰雪稍緩闕然言師老財匱馬
上促戰及軍敗始愀然不敢復言比臣收拾甫定而愀
然者又復闕然責戰矣自有遼難以來用武將用文吏

何非臺省所建白何嘗有一效疆場事當聽疆場吏自為之何用拾帖括語徒亂人意一不從輒怫然怒哉及童蒙還奏備陳廷弼功狀末言臣入遼時士民垂泣而道謂數十萬生靈皆廷弼一人所當其罪何可輕議獨是廷弼受知最深蒲河之役敵攻瀋陽策馬趨救何其壯也及見官兵駕弱遽爾乞骸以歸將置君恩何地廷弼功在存遼微勞雖有可紀罪在負君大義實無所逃此則罪浮於功者矣帝以廷弼力保危城仍議起用天

啟元年瀋陽破應泰死廷臣復思廷弼給事中郭鞏力
詆之并及閣臣劉一燝及遼陽破河西軍民盡奔自塔
山至閭陽二百餘里烟火斷絕京師大震一燝曰使廷
弼在遼當不至此御史江秉謙追言廷弼保守危遼功
兼以排擠勞臣為鞏罪帝乃治前劾廷弼者貶三元修
德應嘉鞏三秩除宗文名御史劉廷宣救之亦被斥乃
復詔起廷弼於家而擢王化貞為巡撫化貞諸城人萬
曆四十一年進士由戶部主事歷右參議分守廣寧蒙

古妙花諸部長乘機窺塞下化貞撫之皆不敢動朱童
蒙勘事還極言化貞得西人心勿輕調隳撫事化貞亦
言遼事將壞惟發帑金百萬亟款西人則敵顧忌不敢
深入會遼潘相繼亡廷議將起廷躬御史方震孺請加
化貞秩便宜從事令與薛國用同守河西乃進化貞右
僉都御史巡撫廣寧廣寧城在山隈登山可俯瞰城內
恃三公河為阻而三公之黃泥窪又水淺可涉廣寧止
孱卒千化貞招集散亡復得萬餘人激厲士民聯絡西

部人心稍定遼陽初失遠近震驚謂河西必不能保化
貞提弱卒守孤城氣不懾時望赫然中朝亦謂其才足
倚悉以河西事付之而化貞又以登萊天津兵可不設
諸鎮入衛兵可止當事益信其有才所奏請輒報可時
金復諸衛軍民及東山曠徒多結砦自固以待官軍其
逃入朝鮮者亦不下二萬化貞請鼓舞諸人優以爵祿
俾自奮於功名詔諭朝鮮褒以忠義勉之同仇帝亦從
之至六月廷弼入朝首請免言官貶謫帝不可乃建三

方布置策廣寧用馬步列壘河上以形勢格之綴敵全力天津登萊各置舟師乘虛入南衛動搖其人心敵必內顧而遼陽可復於是登萊議設巡撫如天津以陶朗先爲之而山海特設經畧節制三方一事權遂進廷弼兵部尚書兼右副都御史駐山海關經畧遼東軍務廷弼因請尚方劍請調兵二十餘萬以兵馬芻糗器械之屬責成戶兵工三部白監軍道臣高出胡嘉棟督餉郎中傅國無罪請復官任事議用遼人故贊畫主事劉國

縉為登萊招練副使夔州同知佟卜年為登萊監軍僉
事故臨洮推官洪敷教為職方主事軍前贊畫用收拾
遼人心竝報允七月廷弼將啟行帝特賜麒麟服一彩
幣四宴之郊外命文武大臣陪餞異數也又以京營選
鋒五千護廷弼行先是袁應泰死薛國用代為經畧病
不任事化貞乃部署諸將沿河設六營營置參將一人
守備二人畫地分守西平鎮武柳河盤山諸要害各置
戍設防議既上廷弼不謂然疏言河窄難恃堡小難容

今日但宜固守廣寧若駐兵河上兵分則力弱敵輕騎
潛渡直攻一營力必不支一營潰則諸營俱潰西平諸
戍亦不能守河上止宜置遊徼兵更番出入示敵不測
不宜屯聚一處為敵所乘自河抵廣寧止宜多置烽堠
西平諸處止宜稍置戍兵為傳烽哨探之用而大兵悉
聚廣寧相度城外形勢犄角立營深壘高柵以俟蓋遼
陽去廣寧三百六十里非敵騎一日能到有聲息我必
預知斷不宜分兵防河先為自弱之計也疏上優旨褒

答會御史方震孺亦言防河大不足恃議乃寢而化貞
以計不行愠甚盡委軍事於廷弼廷弼乃請申諭化貞
不得藉口節制坐失事機先是四方援遼之師化貞悉
改為平遼遼人多不悅廷弼言遼人未叛乞改為平東
或征東以慰其心自是化貞與廷弼有隙而經撫不和
之議起矣八月朔廷弼言三方建置須聯絡朝鮮請亟
發敕使往勞彼國君臣俾盡發八道之師連營江上助
我聲勢又發詔書憫恤遼人之避難彼國者招集團練

別為一軍與朝鮮軍合勢而我使臣即權駐義州控制
聯絡俾與登萊聲息相通於事有濟更宜發銀六萬兩
分犒朝鮮及遼人而臣給與空名劄付百道俾承制拜
除其東山曠徒能結聚千人者即署都司五百人者署
守備將一呼立應而一二萬勁兵可立致也因薦監軍
副使梁之垣生長海濱習朝鮮事可充命使帝立從之
且命如行人奉使故事賜一品服以寵其行之垣乃列
上重事權定職掌八事帝亦報可之垣方與所司議兵

餉而化貞所遣都司毛文龍已襲取鎮江奏捷舉朝大
喜亟命登萊天津發水師二萬應文龍化貞督廣寧兵
四萬進據河上合蒙古軍乘機進取而廷弼居中節制
命既下經撫各鎮互觀望兵不果進頃之化貞備陳東
西情形言敵棄遼陽不守河東失陷將士日夜望官軍
至即執敵將以降而西部虎墩兔炒花咸願助兵敵兵
守海州不過二千河上止遼卒三千若潛師夜襲勢在
必克敵南防者間而北歸我據險以擊其情可盡也兵

部尚書張鶴鳴以為然奏言時不可失御史徐卿伯復

趣之請令廷弼進駐廣寧薊遼總督王象乾移鎮山海

會化貞復馳奏敵因官軍收復鎮江遂驅掠四衛屯民

屯民據鐵山死守傷敵三四千人敵圍之益急急宜赴

救於是兵部愈促進師化貞即以是月渡河廷弼不得

已出關次右屯而馳奏海州取易守難不宜輕舉化貞

卒無功而還化貞為人驤而懷素不習兵輕視大敵好

謾語文武將吏進諫悉不入與廷弼尤抵牾妄意降敵

者李永芳為內應信西部言謂虎墩兔助兵四十萬遂欲以不戰取全勝一切士馬甲仗糗糧營壘俱置不問務為大言罔中朝尚書鶴鳴深信之所請無不允以故廷弼不得行其志廣寧有兵十四萬而廷弼關上無一卒徒擁經畧虛號而已延綏入衛兵不堪用廷弼請罪其帥杜文煥鶴鳴議寬之廷弼請用卜年鶴鳴上駁議廷弼奏遣之垣鶴鳴故稽其餉兩人遂相怨事事齟齬而廷弼亦褊淺剛愎有觸必發盛氣相加朝士多厭惡

之毛文龍鎮江之捷化貞自謂發蹤奇功廷弼言三方
兵力未集文龍發之太早致敵恨遼人屠戮四衛軍民
殆盡灰東山之心寒朝鮮之膽奪河西之氣亂三方並
進之謀誤屬國聯絡之莫目為奇功乃奇禍耳貽書京
師力詆化貞朝士方以鎮江為奇捷聞其言亦多不服
廷弼又以詆鶴鳴謂臣既任經畧四方援軍宜聽臣調
遣乃鶴鳴徑自發戍不令臣知七月中臣咨部問調軍
之數經今兩月置不答臣有經畧名無其實遼左事惟

樞臣與撫臣共為之鶴鳴益恨至九月化貞猶言虎墩
兔兵四十萬且至請速濟師廷弼言撫臣恃西部欲以
不戰為戰計西部與我進不同進彼入北道我入南道
相距二百餘里敵分兵來應亦須我自撐拒臣未敢輕
視敵人謂可不戰勝也臣初議三方布置必使兵馬器
械舟車芻茭無一不備而後尅期齊舉進足戰退亦足
以守今臨事中亂雖樞臣主謀於中撫臣決策於外卜
一舉成功而臣猶有萬一不必然之慮也既而西部竟

不至化貞兵亦不敢進廷弼既與化貞隙中朝右化貞者多詆廷弼給事中楊道寅謂出嘉棟不宜用御史徐景瀛極譽化貞刺廷弼詆之垣逍遙故鄉不稱任使御史蘇琰則言廷弼宜駐廣寧不當遠駐山海因言登萊水師無所用廷弼怒抗疏力詆三人帝皆無所問而帝於講筵忽問卜年係叛族何擢僉事國縉數經論列何起用嘉棟立功贖罪何在天津廷弼知左右譖之抗疏辨語頗憤激是時廷弼主守謂遠人不可用西部不可

恃永芳不可信廣寧多間諜可虞化貞一切反之絕口
不言守謂我一渡河河東人必內應且騰書中朝言仲
秋之月可高枕而聽捷音識者知其必僨事以疆場事
重無敢言其短者至十月冰合廣寧人謂

大清兵必渡河紛然思竄化貞乃與震孺計分兵守鎮
武西平閭陽鎮寧諸城堡而以大軍守廣寧鶴鳴亦以
廣寧可慮請敕廷弼出關廷弼上言樞臣第知經畧一
出足鎮人心不知徒手之經畧一出其動搖人心更甚

且臣駐廣寧化貞駐何地鶴鳴責經撫協心同力而樞
臣與經臣獨不當協心同力乎為今日計惟樞部俯同
於臣臣始得為陛下任東方事也其言甚切至鶴鳴益
不悅廷弼乃復出關至右屯議以重兵內護廣寧外扼
鎮武間陽乃令劉渠以二萬人守鎮武祁秉忠以萬人
守間陽又令羅一貫以三千人守西平復申令曰敵來
越鎮武一步者文武將吏誅無赦敵至廣寧而鎮武間
陽不夾攻掠右屯餉道而三路不救援者亦如之部署

甫定化貞又信諜者言遽發兵襲海州旋亦引退廷弼乃上言撫臣之進及今而五矣八月月間屢進屢止猶未有疏請也若十月二十五日之役則拜疏輒行者也臣疾趨出關而撫臣歸矣西平之會相與協心議守犄角設營而進兵之書又以晦日至矣撫臣以十一月二日赴鎮武臣即以次日赴杜家屯比至中途而軍馬又遣還矣初五日撫臣又欲以輕兵襲牛莊奪馬圈守之為明年進兵門戶時馬圈無一敵兵即得牛莊我不能

守敵何損我何益會將吏力持不可撫臣亦怏怏回矣
兵屢進屢退敵已窺盡伎倆而臣之虛名亦以輕出而
損願陛下明諭撫臣慎重舉止毋為敵人所笑化貞見
疏不悅馳奏辨且曰願請兵六萬一舉蕩平臣不敢貪
天功但厚賚從征將士遼民賜復十年海內得免加派
臣願足矣即有不稱亦必殺傷相當敵不復振保不為
河西憂因請便宜行事時葉向高復當國化貞座主也
頗右之廷臣惟太僕少卿何喬遠言宜專守廣寧御史

夏之令言蒙古不可信款賞無益給事中趙時用言永芳必不可信與廷弼合餘多右化貞令毋受廷弼節制而給事中李精白欲授化貞尚方劍得便宜操縱孫杰劾一燬以用出嘉棟卜年為罪而言廷弼不宜駐關內廷弼憤上言臣以東西南北所欲殺之人而適遘事機難處之會諸臣能為封疆容則容之不能為門戶容則去之何必內借閣部外借撫道以相困又言經撫不和恃有言官言官交攻恃有樞部樞部佐鬪恃有閣臣臣

今無望矣帝以兩臣爭言遣兵部堂官及給事中各一人往諭抗違不遵者治罪命既下廷弼言遣官不便乃下廷臣集議初廷弼之出關也化貞慮奪已兵權佯以兵事委廷弼廷弼上言臣奉命控扼山海非廣寧所得私撫臣不宜卸責於臣會震孺奏經撫不和中有化貞心慵意懶語廷弼據以刺化貞化貞益不悅及化貞請一舉蕩平廷弼乃言宜如撫臣約亟罷臣以鼓士氣當是時中外舉知經撫不和必悞疆事章日上而鶴鳴焉

信化貞遂欲去廷弼二年正月員外郎徐大化希指劾
廷弼大言罩世嫉能妬功不去必壞遼事疏并下部鶴
鳴乃集廷臣大議議撤廷弼者數人餘多請分任責成
鶴鳴獨言化貞一去毛文龍必不用命遼人為兵者必
潰西部必解體宜賜化貞尚方劍專委以廣寧而撤廷
弼他用議上帝不從責吏兵二部再奏會

大清兵逼西平遂罷議仍兼任二臣責以功罪一體無
何西平圍急化貞信中軍孫得功計盡發廣寧兵界得

功及祖大壽往會秉忠進戰廷弼亦馳檄渠撤營赴援
二十二日遇

大清兵平陽橋鋒始交得功及參將鮑承先等先奔鎮
武閭陽兵遂大潰渠秉忠戰沒沙嶺大壽走覺華島西
平守將一貫待援不至與參將黑雲鶴亦戰沒廷弼已
離右屯次閭陽參議邢慎言勸急救廣寧為僉事韓初
命所沮遂退還時

大清兵頓沙嶺不進化貞素任得功為腹心而得功潛

降於

大清欲生縛化貞以為功訛言敵已薄城城中大亂奔走參政高邦佐禁之不能止化貞方闔署理軍書不知也參將江朝棟排闥入化貞怒呵之朝棟大呼曰事急矣請公速走化貞莫知所為朝棟掖之出上馬二僕人徒步從遂棄廣寧踉蹌走與廷弼遇大凌河化貞哭廷弼微笑曰六萬衆一舉蕩平竟何如化貞慙議守寧遠及前屯廷弼曰嘻已晚惟護潰民入關可耳乃以已所

將五千人授化貞為殿盡焚積聚二十六日偕初命護
潰民入關化貞出嘉棟先後入獨邦佐自經死得功率
廣寧叛將迎

大清兵入廣寧化貞逃已兩日矣

大清兵追逐化貞等二百里不得食乃還報至京師大
震鶴鳴恐自請視師二月逮化貞罷廷弼聽勘四月刑
部尚書王紀左都御史鄒元標大理寺卿周應秋等奏
上獄詞廷弼化貞竝論死後當行刑廷弼令汪文言賄

內廷四萬金祈緩既而背之魏忠賢大恨誓速斬廷弼
及楊漣等下獄誣以受廷弼賄甚其罪已邏者獲市人
蔣應暘謂與廷弼子出入禁獄陰謀叵測忠賢愈欲速
殺廷弼其黨門克新郭興治石三畏卓邁等遂希指趣
之會馮銓亦憾廷弼與顧秉謙等侍講筵出市刊遼東
傳譖於帝曰此廷弼所作希脫罪耳帝怒遂以五年八
月棄市傳首九邊已御史梁夢環謂廷弼侵盜軍資十
七萬御史劉徽謂廷弼家資百萬宜籍以佐軍忠賢即

矯旨嚴追罄貲不足姻族家俱破江夏知縣王爾玉責廷弼予貂裘珍玩不獲將撻之其長子兆珪自剄死兆珪母稱冤爾玉去其兩婢衣撻之四十遠近莫不嗟憤崇禎元年詔免追贓其秋工部主事徐爾一訟廷弼冤曰廷弼以失陷封疆至傳首陳屍籍產追贓而臣考當年第覺其罪無足據而勞有足矜也廣寧兵十三萬糧數百萬盡屬化貞廷弼止援遼兵五千人駐右屯距廣寧四十里耳化貞忽同三四百萬遼民一時盡潰廷弼

五千人不同潰足矣尚望其屹然堅壁哉廷弼罪安在
化貞仗西部廷弼云必不足仗化貞信李永芳內附廷
弼云必不足信無一事不力爭無一言不奇中廷弼罪
安在且屢疏爭各鎮節制不行屢疏爭原派兵馬不與
徒擁虛器抱空名廷弼罪安在唐郭子儀李光弼與九
節度師同潰自應收潰兵扼河陽橋無再往河陽坐待
思明縛去之理今計廣寧西止關上一門限不趣扼關
門何待史稱慕容垂一軍三萬獨全亦無再駐淝水與

晉人決戰之理廷弼能令五千人不散至大凌河付與
化貞事政相類寧得與化貞同日道乎所謂勞有足矜
者當三路同時陷沒開鐵北關相繼奔潰廷弼經理不
及一年俄進築奉集瀋陽俄進屯虎皮驛俄迎扼敵兵
於橫河上於遼陽城下鑿河列柵埋礮屹然樹金湯令
得竟所施何至舉榆口關外拱手授人而今俱抹殺不
論乃其所由必死則有故矣其才既籠蓋一時其氣又
陵厲一世揭辯紛紛致櫻衆怒共起殺機是則所由必

殺其軀之道耳當廷弼被勘被逮之時天日輒為無光
足明其冤乞賜昭雪為勞臣勸不從明年五月大學士
韓爌等言廷弼遺骸至今不得歸葬從來國法所未有
今其子疏請歸葬臣等擬票許之蓋國典皇仁並行不
悖理合如此若廷弼罪狀始末亦有可言皇祖朝戊申
己酉間廷弼以御史按遼東早以遼患為慮請核地界
飭營伍聯絡南北闢大聲疾呼人莫為應十年而驗若
左券其可言者一戊午己未楊鎬三路喪師撫順清河

陷沒皇祖用楊鶴言召起廷弼代鎬一年餘修飭守具
邊患稍寧會皇祖賓天廷議以廷弼無戰功攻使去使
袁應泰代四閱月而遼亡使廷弼在未必至此其可言
者二遼陽既失先帝思廷弼言再起之田間復任經畧
化貞主戰廷弼主守羣議皆是化貞廷弼屢言玩師必
敗奸細當防莫有聽者徘徊躑躅以五千人駐右屯化
貞兵十三萬駐廣寧廣寧潰右屯乃與俱潰其可言者
三假令廷弼於此時死守右屯捐軀殉封疆豈非節烈

奇男子不然支撐寧前錦義間扶傷救敗收拾殘黎猶可圖桑榆之效乃倉皇風鶴偕化貞竝馬入關其意以我固嘗言之言而不聽罪當末減此則私心短見殺身以此殺身而無辭公論亦以此傳首邊庭頭足異處亦足為臨難鮮忠者之戒矣然使誅廷弼者按封疆失陷之條偕同事諸臣一體伏法廷弼九原目瞑乃先以賄賊拷坐楊漣魏大中等作清流陷阱既而刊書惑衆借題曲殺身死尚懸坐賊十七萬辱及妻孥長子兆珪迫

極自刎斯則廷弼死未心服海內忠臣義士亦多憤惋
竊歎者特以封疆二字噤不敢訟陳皇上之前臣等平
心論之自有遼事以來誰官營私者何算廷弼不取一
金錢不通一饋問焦屑敝舌爭言大計魏忠賢盜竊威
福士大夫靡然從風廷弼以長繫待決之人屈曲則生
抗違則死乃終不改其強直自遂之性致獨膺顯戮慷
慨赴市耿耿剛腸猶未盡其今縱不敢深言而傳首已
踰三年收葬原無禁例聖明必當垂仁臣所以娓娓及

此者以茲事雖屬封疆而實陰繫朝中邪正本末皇上
天縱英哲或不以臣等為大謬也詔許其子持首歸葬
五年化貞始伏誅

袁崇煥字元素東莞人萬曆四十七年進士授邵武知
縣為人慷慨負膽畧好談兵遇老校退卒輒與論塞上
事曉其阨塞情形以邊才自許天啟二年正月朝覲在
都御史侯恂請破格用之遂擢兵部職方主事無何廣
寧師潰廷議扼山海關崇煥即單騎出閱關內外部中

失袁主事訝之家人亦莫知所往已還朝具言關上形勢曰予我軍馬錢穀我一人足守此廷臣益稱其才遂超擢僉事監關外軍發帑金二十萬俾招募時關外地悉為哈刺慎諸部所據崇煥乃駐守關內未幾諸部受款經畧王在晉令崇煥移駐中前所監參將周守廉遊擊左輔軍經理前屯衛事尋令赴前屯安置遼人之失業者崇煥即夜行荆棘虎豹中以四鼓入城將士莫不壯其膽在晉深倚重之題為寧前兵備僉事然崇煥薄

在晉無遠畧不盡遵其令及在晉議築重城八里鋪崇
煥以為非策爭不得奏記首輔葉向高十三山難民十
餘萬久困不能出大學士孫承宗行邊崇煥請將五千
人駐寧遠以壯十三山勢別遣驍將救之寧遠去山二
百里便則進據錦州否則退守寧遠奈何委十萬人置
度外承宗謀於總督王象乾象乾以關上軍方喪氣議
發插部護關者三千人往承宗以為然告在晉在晉竟
不能救衆遂沒脫歸者僅六千人而已及承宗敗重城

議集將吏謀所守閭鳴泰主覺華崇煥主寧遠在晉及
張應吾邢慎言持不可承宗竟主崇煥議已承宗鎮關
門益倚崇煥崇煥內拊軍民外飭邊備勞績大著崇煥
嘗核虛伍立斬一校承宗怒曰監軍可專殺耶崇煥頓
首謝其果於用法類此三年九月承宗決守寧遠僉事
萬有孚劉詔力阻不聽命滿桂偕崇煥往初承宗令祖
大壽築寧遠城大壽度中朝不能遠守築僅十一且疎
薄不中程崇煥乃定規制高三丈二尺雉高六尺址廣

三丈上二丈四尺大壽與參將高見賀謙分督之明年
迄工遂為關外重鎮桂良將而崇煥勤職誓與城存亡
又善撫將士樂為盡力由是商旅輻輳流移駢集遠近
望為樂土遭父憂奪情視事四年九月偕大將馬世龍
王世欽率水陸馬步軍萬二千東巡廣寧謁北鎮祠歷
十三山抵右屯遂由水道泛三岔河而還尋以五防敎
勞進兵備副使再進右參政崇煥之東巡也請即復錦
州右屯諸城承宗以為時未可乃止至五年夏承宗與

崇煥計遣將分據錦州松山杏山右屯及大小凌河繕
城郭居之自是寧遠且為內地開疆復二百里十月承
宗罷高第來代謂關外必不可守令盡撤錦右諸城守
具移其將士於關內督屯通判金啟宗上書崇煥曰錦
右大凌三城皆前鋒要地倘收兵退既安之民庶復播
遷已得之封疆再淪沒關內外堪幾次退守耶崇煥亦
力爭不可言兵法有進無退三城已復安可輕撤錦右
動搖則寧前震驚關門亦失保障今但擇良將守之必

無他慮第意堅且欲并撤寧前二城崇煥曰我寧前道也官此當死此我必不去第無以難乃撤錦州右屯大小凌河及松山杏山塔山守具盡驅屯兵入關委棄米粟十餘萬而死亡載達哭聲震野民怨而軍益不振崇煥遂乞終制不許十二月進按察使視事如故我

大清知經畧易與六年正月舉大軍西渡遼河二十三日抵寧遠崇煥聞即偕大將桂副將左輔朱海參將大壽守備何可剛等集將士誓死守崇煥更刺血為書激

以忠義為之下拜將士咸請效死乃盡焚城外民居攜
守具入城清野以待令同知程維模詰奸通判啟侔具
守卒食辟道上行人檄前屯守將趙率教山海守將楊
麒將士逃至者悉斬人心始定明日

大軍進攻戴楯穴城矢石不能退崇煥令閩卒羅立發
西洋巨礮傷城外軍明日再攻復被却圍遂解而啟侔
亦以然礮死啟侔起小吏官經歷主賞功事勤敏有志
介承宗重之用為通判核兵馬錢糧督城工理軍民詞

訟大得衆心死贈光祿少卿世廕錦衣試百戶初中朝
聞警兵部尚書王永光大集廷臣議戰守無善策經畧
第總兵麒並擁兵關上不救中外謂寧遠必不守及崇
煥以書間舉朝大喜立擢崇煥右僉都御史璽書獎勵
桂等進秩有差我

大清初解圍分兵數萬畧覺華島殺參將金冠等及軍
民數萬崇煥方完城力竭不能救也高第鎮關門大反
承宗政務折辱諸將諸將咸解體遇麒若偏裨麒至見

侮其卒至是坐失援第麒並褫官去而以王之臣代第
趙率教代麒我

大清舉兵所向無不摧破諸將罔敢議戰守議戰守自
崇煥始三月復設遼東巡撫以崇煥為之魏忠賢遣其
黨劉應坤紀用等出鎮崇煥抗疏諫不納叙功加兵部
右侍郎賚銀幣世廕錦衣千戶崇煥既解圍志漸驕與
桂不協請移之他鎮乃召桂還崇煥以之臣奏留桂又
與不協中朝慮債事命之臣專督關內以關外屬崇煥

畫關守崇煥虞廷臣忌已上言陛下以關內外分責二
臣用遼人守遼土且守且戰且築且屯屯種所入可漸
減海運大要堅壁清野以為體乘間擊瑕以為用戰雖
不足守則有餘守既有餘戰無不足顧勇猛圖敵敵必
讐奮迅立功衆必忌任勞則必召怨蒙罪始可有功怨
不深則勞不著罪不大則功不成謗書盈篋毀言日至
從古已然惟聖明與廷臣始終之帝優旨褒答其冬崇
煥偕應坤用率教巡歷錦州大小凌河議大興屯田漸

復第所棄舊土忠賢與應坤等並因是廢錦衣崇煥進
所廢為指揮僉事崇煥遂言遼左之壞雖人心不固亦
緣失有形之險無以固人心兵不利野戰祇有憑堅城
用大礮一策今山海四城既新當更修松山諸城班軍
四萬人缺一不可帝報從之先是八月中我

太祖高皇帝晏駕崇煥遣使弔且以覘虛實我

太宗文皇帝遣使報之崇煥欲議和以書附使者還報我
大清兵將討朝鮮欲因此阻其兵得一意南下七年正

月再遣使答之遂大興兵渡鴨綠江南討朝議以崇煥之臣不相能召之臣還罷經畧不設以關內外盡屬崇煥與鎮守中官應坤用並便宜從事崇煥銳意恢復乃乘

大軍之出遣將繕錦州中左大凌三城而再使使持書議和會朝鮮及毛文龍同告急朝命崇煥發兵援崇煥以水師援文龍又遣左輔趙率教朱梅等九將將精卒九千先後逼三公河為牽制之勢而朝鮮已為

大清所服諸將乃還崇煥初議和中朝不知及奏報優
旨許之後以為非計頻告戒諭崇煥欲藉是修故疆持
愈力而朝鮮及文龍被兵言官因謂和議所致四月崇
煥上言關外四城雖延袤二百里北負山南阻海廣四
十里爾今屯兵六萬商民數十萬地隘人稠安所得食
錦州中左大凌三城修築必不可已業移商民廣開屯
種倘城不完而敵至勢必撤還是棄垂成功也故棄敵
有事江東姑以和之說緩之敵知則三城已完戰守又

在關門四百里外金湯益固矣帝優旨報聞時率教駐
錦州護版築朝命尤世祿來代又以輔為前鋒總兵官
駐大凌河世祿未至輔未入大凌五月十一日

大清兵直抵錦州四面合圍率教偕中官用嬰城守而
遣使議和欲援師以待救使三返不決圍益急崇煥以
寧遠兵不可動選精騎四千令世祿大壽將繞出

大軍後決戰別遣水師東出相牽制且請發薊鎮宣大
兵東護關門朝廷已命山海滿桂移前屯三屯孫祖壽

移山海宣府黑雲龍移一片石薊遼總督閻鳴泰移關城又發昌平天津保定兵馳赴上關檄山西河南山東守臣整兵聽調世祿等將行

大清已於二十八日分兵趨寧遠崇煥與中官應坤副使畢自肅督將士登陴守列營濠內用礮距擊而桂世祿大壽大戰城外士多死桂身被數矢

大軍亦旋引去益兵攻錦州以溽暑不能克士卒多損傷六月五日亦引還因毀大小凌河二城時稱寧錦大

捷桂率教功為多忠賢因使其黨論崇煥不救錦州為
暮氣崇煥遂乞休中外方爭頌忠賢崇煥不得已亦請
建祠終不為所喜七月遂允其歸而以王之臣代為督
師兼遼東巡撫駐寧遠及叙功文武增秩賜廕者數百
人忠賢子亦封廕而崇煥止增一秩尚書霍維華不平
疏乞讓廕忠賢亦不許未幾熹宗崩莊烈帝即位忠賢
伏誅削諸冒功者廷臣爭請召崇煥其年十一月擢右
都御史視兵部添注左侍郎事崇禎元年四月命以兵

部尚書兼右副都御史督師薊遼兼督登萊天津軍務

所司敦促上道七月崇煥入都先奏陳兵事帝召見平

臺慰勞甚至咨以方畧對曰方畧已具疏中臣受陛下

特眷願假以便宜計五年全遼可復帝曰復遼朕不吝

封侯賞卿努力解天下倒懸卿子孫亦受其福崇煥頓

首謝帝退少憩給事中許譽卿叩以五年之畧崇煥言

聖心焦勞聊以是相慰耳譽卿曰上英明安可漫對異

日按期責效奈何崇煥撫然自失頃之帝出即奏言東

事本不易竣陛下既委臣臣安敢辭難但五年內戶部
轉軍餉工部給器械吏部用人兵部調兵選將須中外
事事相應方克有濟帝為飭四部臣如其言崇煥又言
以臣之力制全遼有餘調衆口不足一出國門便成萬
里忌能妬功夫豈無人即不以權力掣臣肘亦能以意
見亂臣謀帝起立傾聽諭之曰卿無疑慮朕自有主持
大學士劉鴻訓等請收還之臣桂尚方劍以賜崇煥假
之便宜帝悉從之賜崇煥酒饌而出崇煥以前此熊廷

弼孫承宗皆為人排搆不得竟其志上言恢復之計不
外臣昔年以遼人守遼土以遼土養遼人守為正著戰
為奇著和為旁著之說法在漸不在驟在實不在虛此
臣與諸邊臣所能為至用人之人與為人用之人皆至
尊司其鑰何以任而勿貳信而勿疑蓋馭邊臣與廷臣
異軍中可驚可疑者殊多但當論成敗之大局不必摘
一言一行之微瑕事任既重為怨實多諸有利於封疆
者皆不利於此身者也况圖敵之急敵亦從而間之是

以為邊臣甚難陛下愛臣知臣臣何必過疑懼但中有
所危不敢不告帝優詔答之賜蟒玉銀幣疏辭蟒玉不
受是月川湖兵戍寧遠者以缺餉四月大譟餘十三營
起應之縛繫巡撫畢自肅總兵官朱梅通判張世榮推
官蘇涵淳於譙樓上自肅傷重兵備副使郭廣初至躬
翼自肅括撫賞及朋椿二萬金以散不厭貸商民足五
萬乃解自肅疏引罪走中左所自經死崇煥以八月初
抵關聞變馳與廣密謀宥首惡張正朝張思順令捕十

五人戮之市斬知謀中軍吳國琦責參將彭簪古黜都

司左良玉等四人發正朝思順前鋒立功世榮涵淳以

貪虐致變亦斥之獨都司程大樂一營不從變特為獎

勵一方乃靖關外大將四五人事多掣肘後定設二人

以梅鎮寧遠大壽仍駐錦州至是梅將解任崇煥請合

寧錦為一鎮大壽仍駐錦州加中軍副將何可剛都督

僉事代梅駐寧遠而移薊鎮率教於關門關內外止設

二大將因極稱三人之才謂臣自期五年專藉此三人

當與臣相終始屆期不效臣手戮三人而身歸死於司
敗帝可之崇煥遂留鎮寧遠自肅既死崇煥請停巡撫
及登萊巡撫孫國楨免崇煥又請罷不設帝亦報可哈
刺慎三十六家向受撫賞後為插漢所迫且歲饑有叛
志崇煥召至於邊親撫慰皆聽命二年閏四月叙春秋
兩防功加太子太保賜蟒衣銀幣廕錦衣千戶崇煥始
受事即欲誅毛文龍文龍者仁和人以都司援朝鮮逗
留遼東遼東失自海道遁回乘虛襲殺

大清鎮江守將報巡撫王化貞而不及經畧熊廷弼兩
人隙始開用事者方主化貞遂授文龍總兵累加至左
都督掛將軍印賜尚方劍設軍鎮皮島如內地皮島亦
謂之東江在登萊大海中綿亘八十里不生草本遠南
岸近北岸北岸海面八十里即抵

大清界其東北海則朝鮮也島上兵本河東民自天啟
元年河東失民多逃島中文龍籠絡其民為兵分布哨
船聯接登州以為犄角計中朝是之島事由此起四年

五月文龍遣將沿鴨綠江越長白山侵

大清國東偏為守將擊敗衆盡殲八月遣兵從義州城西渡江入島中屯田

大清守將覺潛師襲擊斬五百餘級島中糧悉被焚五年六月遣兵襲耀州之官屯寨敗歸六年五月遣兵襲鞍山驛喪其卒千餘越數日又遣兵襲撤爾河攻城南為

大清守將所却七年正月

大清兵征朝鮮并規剿文龍三月

大清兵克義州分兵夜擣文龍於鐵山文龍敗遁歸島
中時

大清惡文龍躡後故致討朝鮮以其助文龍為兵端顧
文龍所居東江形勢雖足牽制其人本無大畧往輒敗
衄而歲糜餉無算且惟務廣招商賈販易禁物名濟朝
鮮實闢出塞無事則鬻參販布為業有事亦罕得其用
工科給事中潘士聞劾文龍糜餉殺降尚寶卿董茂忠

請撤文龍治兵關寧兵部議不可而崇煥心弗善也嘗疏請遣部臣理餉文龍惡文臣監制抗疏駁之崇煥不悅及文龍來謁接以賓禮文龍又不讓崇煥謀益決至是遂以閱兵為名泛海抵雙島文龍來會崇煥與相燕飲每至夜分文龍不覺也崇煥議更營制設監司文龍怫然崇煥以歸鄉動之文龍曰向有此意但惟我知東事東事畢朝鮮衰弱可襲而有也崇煥益不悅以六月五日邀文龍觀將士射先設幄山上令參將謝尚政等

伏甲士幄外文龍至其部卒不得入崇煥曰予詰朝行
公當海外重寄受予一拜交拜畢登山崇煥問從官姓
名多毛姓文龍曰此皆予孫崇煥笑因曰爾等積勞海
外月米止一斛言之痛心亦受予一拜為國家盡力衆
皆頓首謝崇煥因詰文龍違令數事文龍抗辯崇煥厲
色叱之命去冠帶繫縛文龍猶倔强崇煥曰爾有十二
斬罪知之乎祖制大將在外必命文臣監爾專制一方
軍馬錢糧不受核一當斬人臣之罪莫大欺君爾奏報

盡欺罔殺降人難民冒功二當斬人臣無將將則必誅
爾奏有牧馬登州取南京如反掌語大逆不道三當斬
每歲餉銀數十萬不以給兵月止散米三斗有半侵盜
軍糧四當斬擅開馬市於皮島私通外番五當斬部將
數千人悉冒己姓副將以下濫給札付千走卒輿夫盡
金緋六當斬自寧遠還剽掠商船自為盜賊七當斬強
取民間子女不知紀極部下效尤人不安室八當斬驅
難民遠竊人參不從則餓死島上白骨如莽九當斬輦

金京師拜魏忠賢為父塑冕旒像於島中十當斬鐵山之敗喪軍無算掩敗為功十一當斬開鎮八年不能復寸土觀望養敵十二當斬數畢文龍喪魂魄不能言但叩頭乞免崇煥召諭其部將曰文龍罪狀當斬否皆惶怖唯唯中有稱文龍數年勞苦者崇煥叱之曰文龍一布衣爾官極品滿門封廕足酬勞何恃逆如是乃頓首請旨曰臣今誅文龍以肅軍諸將中有若文龍者悲誅臣不能成功皇上亦以誅文龍者誅臣遂取尚方劍斬

之帳前乃出諭其將士曰誅止文龍餘無罪當是時文龍麾下健校悍卒數萬憚崇煥威無一敢動者於是命棺斂文龍明日具牲醴拜奠曰昨斬爾朝廷大法今祭爾僚友私情為下淚乃分其卒二萬八千為四協以文龍子承祚副將陳繼盛參將徐敷奏遊擊劉興祚主之收文龍敕印尚方劍令繼盛代掌擣軍士檄撫諸島盡除文龍虐政還鎮以其狀上聞未言文龍大將非臣得擅誅謹席蒙待罪時崇禎二年五月也帝驟聞意殊駭

念既死且方倚崇煥乃優旨褒答俄傳諭暴文龍罪以
安崇煥心其爪牙伏京師者令所司捕崇煥上言文龍
一匹夫不法至此以海外易為亂也其衆合老稚四萬
七千妄稱十萬且民多兵不能二萬妄設將領千今不
宜更置帥即以繼盛攝之於計便帝報可崇煥雖誅文
龍慮其部下為變增餉銀至十八萬然島弁失主帥心
漸攜益不可用其後致有叛去者崇煥言東江一鎮牽
制所必資今定兩協馬軍十營步軍五歲餉銀四十二

萬米十三萬六千帝頗以兵減餉增為疑以崇煥故特如其請崇煥在遼與率教大壽可剛定兵制漸及登萊天津及定東江兵制合四鎮兵十五萬三千有奇馬八萬一千有奇歲費度支四百八十餘萬減舊一百二十餘萬帝嘉獎之文龍既死甫踰三月我

大清兵數十萬分道入龍井關大安口崇煥聞即督大壽可剛等入衛以十一月十日抵薊州所歷撫寧永平遷安豐潤玉田諸城皆留兵守帝聞其至甚喜溫旨褒

勉發帑金犒將士令盡統諸道援軍俄聞率教戰歿遵
化三屯營皆破巡撫王元雅總兵朱國彥自盡

大清兵越薊州而西崇煥懼急引兵入護京師營廣渠
門外帝立召見深加慰勞咨以戰守策賜御饌及貂裘
崇煥以士馬疲敝請入休城中不許出與

大軍鏖戰互有殺傷時所入隘口乃薊遼總理劉策所
轄而崇煥甫聞變即千里赴救自謂有功無罪然都人
驟遭兵怨謗紛起謂崇煥縱敵擁兵朝士因前通和議

誣其引敵脅和將為城下之盟帝頗聞之不能無惑會我

大清設間謂崇煥密有成約令所獲宦官知之陰縱使去其人奔告於帝帝信之不疑十二月朔再召對遂縛下詔獄大壽在旁戰栗失措出即擁兵叛歸大壽嘗有罪孫承宗欲殺之愛其才密令崇煥解救大壽以故德崇煥懼并誅遂叛帝取崇煥獄中手書往召大壽乃歸命方崇煥在朝嘗與大學士錢龍錫語微及欲殺毛文

龍狀及崇煥欲成和議龍錫嘗移書止之龍錫故主定
逆按魏忠賢遺黨王永光高捷袁弘勲史莖輩謀興大
獄為逆黨報讐見崇煥下吏遂以擅主和議專戮大帥
二事為兩人罪捷首疏力攻莖弘勲繼之必欲并誅龍
錫法司坐崇煥謀叛龍錫亦論死三年八月遂磔崇煥
於市兄弟妻子流三千里籍其家崇煥無子家亦無餘
貲天下冤之崇煥既縛大壽潰而去武經畧滿桂以趣
戰急與

大清兵戰竟死去縛崇煥時甫半月初崇煥妄殺文龍至是帝誤殺崇煥自崇煥死邊事益無人明亡徵決矣趙光抃字彥清九江德化人父贊化工部郎中光抃舉天啟五年進士鄉人曹欽程父事魏忠賢驟得太僕少卿光抃語之曰富貴一時名節千古君不可不審欽程惡之即日出贊化為南寧知府南寧惡地贊化佗僚而死光抃奔喪歸崇禎初服闋除工部都水主事歷兵部職方郎中十年秋遣閱薊遼戎務盡得邊塞形勢戰守

機宜列十二章以獻明年冬

大清兵入密雲總督吳阿衡敗歿廷議增設巡撫一人
駐密雲遂擢光祚右僉都御史任之至即發監視中官
鄧希詔奸謀帝召希詔還而令分守中官孫茂霖覈實
茂霖為希詔解光祚反得罪遣戍廣東十五年兵事益
棘廷臣薦光祚復官光祚家素饒聞命持數萬金入都
為軍資既至召見德政殿奏對稱旨拜兵部右侍郎兼
右僉都御史總督薊州永平山海通州天津諸鎮軍務

而

大清已克薊州分兵四出命光抃兼督諸路援軍諸援軍觀望河間迤南皆失守光抃不敢救尾而南已聞塞上警又驅而北廷臣文章劾光抃謂列城被攻不救退回高陽坐視淪覆明年復論光抃及范志完四月

大清兵北旋光抃唐通白廣恩等八鎮兵邀於螺山皆敗走帝聞大怒既解嚴與志完並獲譴帝召見雷續祚續祚詆志完而稱光抃帝曰志完光抃逗遛河間獨罪

志完渠服其心乎遂并逮光抃光抃嘗薦廣恩廣恩抗
不赴召帝以是益惡光抃卒與志完同日斬西市光抃
才氣豪邁而於大慮亦疎在職方深為尚書楊嗣昌所
倚曰吾不及光抃先是毛文龍據東江海疆賴之文龍
死陳繼盛黃龍沈世魁代其部往往為亂中朝又素以
糜餉為憂及世魁死島中無帥光抃愆吏嗣昌撤之二
十年積患一朝而除而於邊計亦左焉光抃雖文士有
膽決嘗遇敵諸將欲奔光抃坐地不起久之乃引歸其

起戍中也將士不相習猝遇大敵先膽落故所當輒敗
然受事破軍之餘身先被創顧與志完同誅人咸以為
冤福王時太僕萬元吉奏復其官范志完虞城人崇禎
四年進士授永平推官專理插漢撫賞意不欲行上疏
言權輕請得特疏奏軍事當事者惡之謫湖廣布政司
檢校擢寧國推官歷官分巡關內僉事十四年冬起擢
右僉都御史巡撫山西其座主周延儒當國遂拜志完
兵部右侍郎兼右僉都御史總督薊州永平山海通州

天津諸鎮軍務代楊繩武繩武者雲南彌勒人也由庶

吉士改授御史十一年冬用楊嗣昌薦召見吐言如流

畫地成圖帝偉之遂超擢右僉都御史巡撫順天洪承

疇困松山遂擢繩武總督尋以志完代之而令繩武總

督遼東寧遠諸軍出關救松錦加銜督師明年正月繩

武卒官贈兵部尚書廕錦衣世襲百戶遂進志完左侍

郎督師出關如繩武而以張福臻督薊鎮駐關內自王

樸諸軍敗兵力益單松錦相繼失志完乃築五城寧遠

城南護轉輸募土著實之又議修覺華島城為犄角勢
帝甚倚之六月易銜欽命督師總督薊遼昌平通等處軍
務節制登津撫鎮遼事急則移駐中後前屯關內急則
星馳入援三協有警則會同薊昌二督并力策應時關
內外並建二督而關外加督師銜地望尤尊又於昌平
保定設二督於是千里之內有四督臣又有寧遠永平
順天密雲天津保定六巡撫寧遠山海中協西協昌平
通州天津保定八總兵星羅碁置無地不防而事權反

不一十五年給事中方士亮劾福臻昏庸因言移督師
關內則薊督可裁福臻可罷於是召還福臻令志完兼
制關內移駐關門志完辭不許求去不許上疏言不能
兼薊請仍設薊督踰月始以趙光抃任之而

大清兵已入自牆子嶺克薊州而南下矣兵部劾志完
疎防廷臣亦言志完貪懦帝以敵兵未退責令戴罪立
功然志完無謀畧恒怯甚不敢一戰所在州縣覆沒惟
尾而呵噪兵所到剽虜至德州僉事雷縉祚劾之自是

論列者益衆帝猶責志完後效志完終不敢戰明年

大清兵攻下海州贛榆沐陽豐縣已而北旋志完光抃

卒觀望皆不進事定議罪召續祚廷質問志完逗遛淫

掠狀志完辨問御史吳履中對如續祚言時座主延儒

督師亦無功遂命下志完獄以十二月斬志完先是十

二年封疆之案伏罪者三十有六人至是失事甚於前

誅止志完光抃及巡撫馬成名潘永圖總兵薛敏忠副

將柏永鎮其他悉置不問而保定巡撫楊進得善去山

東巡撫王永吉反獲遷擢帝之用刑至是窮矣

贊曰三路喪師收降取敗錫與應泰同辜然君子重繩
錫而寬論應泰豈不以士所重在節哉惜乎廷弼以蓋
世之材徧性取忌功名顯於遼亦隲於遼假使廷弼效
死邊城義不反顧豈不毅然節烈丈夫哉廣寧之失罪
由化貞乃以門戶曲殺廷弼化貞稽誅者且數年崇煥
智雖疎差有膽畧莊烈帝又以讒間誅之國步將移刑
章顛覆豈非天哉

明史卷二百五十九

欽定四庫全書

明史卷二百五十九考証

楊鎬傳賴沈惟敬就禽鄉導乃絕

臣章宗瀛按沈惟

敬以奉使封倭與平秀吉相結至是總督邢玠發其
奸執送麻貴營詳見朝鮮傳此處所云鄉導絕蓋指
此謹附考

楊鎬傳總兵官張承蔭

臣章宗瀛按張承蔭訓本誤

作承允謹改後仿此

楊鎬傳劉綆出寬甸由晾馬甸搥後

臣章宗瀛按方

輿紀要晾馬甸亦曰晾馬臺在松子嶺東北傳作涼馬誤謹據改舊本甸誤莫晾誤涼謹據改

熊廷弼傳中書汪文言哀廷弼冤奔走公卿間為營救忠賢聞之大恨

舊本作廷弼令汪文言賄內廷

四萬金祈緩既而背之魏忠賢大恨

臣章宗瀛按

汪文言納賄事乃梁夢環藉是以興大獄欲并害楊連左光斗等閣黨傳所載甚明其實廷弼性剛負氣

既非屑於行賄之人文言雖非正人然名隸點將錄亦與忠賢素不相習傳直云廷弼令汪文言賄內廷四萬金不知何据且以忠賢之力若果有此說亦何難并免其逮治而求緩須臾耶觀後韓爌等稱廷弼不愛一錢不通一饋諸語更可證此事之誣蓋當時汪文言力為援救因觸怒忠賢而逮之死則有之耳謹擬改

袁崇煥傳十三山難民十餘萬久困不得出

臣章宗

瀛按十三山在廣寧衛西南七十里乃地名又堡名也其西八十里達錦州之小凌河見方輿紀要其時化貞失事難民之未盡入關者皆屯於此故崇煥籌及之謹附考

袁崇煥傳遣使議和欲緩師以待救

臣

章宗瀛按緩

師刻本作援師考是時

大兵圍錦州急故率教等議和以緩攻援字當係誤刊

謹改

袁崇煥傳上聞末言文龍大將非臣得擅誅謹席藁待
罪時崇禎二年五月也

臣章宗瀛按袁崇煥之誅

毛文龍明本紀作崇禎二年六月傳作五月互異謹
識

附明史卷二百五十九考證後

乾隆四十一年

賜諡諸臣

張承蔭 趙率教 羅一貫

以上通諡忠烈

頗廷相 鄒儲賢 賀世賢 尤世功 朱策

童仲揆 李秉誠 梁仲善 姜弼 朱萬良

劉渠 祁秉忠

以上通諡烈愍

王命印 王元雅 朱國彥 吳阿衡

以上通諡節愍

袁應泰 通諡忠節



總校官編修臣吳紹濬

欽定四庫全書薈要

史部
明史卷二百六十一

詳校官兵部主事 雷純



欽定四庫全書薈要卷六千八百五十三

史部

明史卷二百六十

大學士張廷玉等奉 敕修

傳第一百四十八

楊鶴

從弟鶚

陳奇瑜

元

默

熊文燦

洪雲蒸

練國事

丁啓睿

從父魁楚

鄭崇儉

方孔炤
楊一鵬

邵捷春

余應桂



高斗樞

張任學

楊鶴字修齡武陵人萬厯三十二年進士授雒南知縣
調長安四十年擢御史上疏請東宮講學且言頃者愛
女被躡於宮奴館甥受撻於朝市叩閭不聞上書不達
壅蔽極矣時壽寧主壻冉興讓為掌家宮人梁盈女內
官彭進朝等毆辱公主三奏不達興讓掛冠長安門去
故鶴言及之尋出督兩淮鹽法巡按貴州貴州接壤烏
撒去川南敘州千里節制難土官安雲龍死其族人與

雷益安效良爭印構兵三十年後竟為效良所據其父
紹慶又據雷益州皆川雲貴咽喉地鶴請割烏撒隸貴
州地近節制便可弭後患朝議不決未幾效良為亂如
其言貴州土官以百數水西安氏最大而土地戶口貢
賦之屬無籍可稽鶴乃檄宣慰安位盡著之籍并首領
目把主名承襲源委悉列上有司自是簿牒始明奸弊
易核事竣不候命徑歸久之還朝楊鎬四路師敗鶴薦
熊廷弼張鶴鳴李長庚薛國用袁應泰言遼事之失不

料彼已喪師辱國誤在經略不諳機宜馬上催戰誤在
輔臣調度不聞束手無策誤在樞部至尊優柔不斷又
至尊自誤當事惡其直將假他事逐之乃引疾去丁外
艱天啓初起太僕少卿擢右僉都御史巡撫南贛未任
丁內艱而廣寧又敗魏忠賢以鶴黨護廷弼除鶴名崇
禎元年召拜左僉都御史進左副都御史鶴上言圖治
之要在培元氣自大兵大役加派頻仍公私交罄小民
之元氣傷自遼左黔蜀喪師失律暴骨成邱封疆之元

氣傷自措紳構黨彼此相傾逆奄乘之誅鋤善類士大夫之元氣傷譬如重病初起百脈未調風邪易入道在培養時以為名言先是遼左用兵逃軍憚不敢歸伍相聚剝虜至是關中頻歲祲有司不恤下白水王二者鳩衆墨其面闖入澄城殺知縣張耀采由是府谷王嘉允漢南王大梁階州周大旺羣賊蠭起三邊饑軍應之流氛之始也當是時承平久卒被兵人無固志大吏惡聞賊曰此饑氓徐自定耳明年總督武之望死久之廷臣

莫肯往者羣推鶴帝召見鶴問方略對曰清慎自持撫
恤將卒而已遂拜鶴兵部右侍郎代之望總督陝西三
邊軍務至則大梁大旺王二已前誅滅而繼起者益衆
鶴素有清望然不知兵其冬京師戒嚴延綏寧夏甘肅
固原臨洮五鎮總兵官悉以勤王行延綏兵中道逃歸
甘肅兵亦譁懼誅並合於賊賊益張三年正月王左掛
等攻宜川為知縣成材所却轉攻韓城軍中無帥鶴命
參政洪承疇禦之俘斬三百餘人圍解賊走清澗鶴連

疏請諸將還鎮不果起故將杜文煥任之二月延安知府張輦都司艾穆覈賊延川降其魁王子順張述聖姬三兒別賊王嘉允掠延安慶陽鶴匿不奏而給降賊王虎小紅狼一大青掠地虎混江龍等免死牒安置延綏河曲間賊淫掠如故有司不敢問寇患成於此矣七月嘉允陷黃甫清水木瓜遂陷府谷文煥擊走之賊流入山西已撫王左掛以白汝學攻綏德州謀內應事覺巡按李應期與承疇計誅左掛等綏德五十七人皆死十

二月賊神一元攻陷新安寧塞柳樹澗等堡寧塞文煥
所居宗人多死明年正月賊棄寧塞陷保安一元死弟
一魁圍慶陽陷合水鶴聞移駐寧州一魁求撫送還合
水知縣蔣應昌別賊拓先齡金翅鵬過天星田近菴獨
頭虎上天龍等亦先後降鶴設御座於城樓賊跪拜呼
萬歲鶴宣聖諭令設誓或歸伍或歸農賊佯應之則立
赦其罪羣盜自是視總督如兒戲矣鶴又以一魁最強
致其壻帳中同卧起而一魁果至數以十罪則稽首謝

即宣詔赦之畀以官處其衆四千餘人於寧塞使守備
吳弘罷護焉文煥聞之歎曰寧塞之役賊畏我而逃今
者賊偽降楊公信之借名城為盜資我宗人可與賊逼
處此土乎遂以其族行五月鶴移駐耀州賊攻破金鎖
關殺都司王廉七月別賊李老柴獨行狼攻陷中部田
近菴以六百人守馬欄山應之而降渠一魁之黨茹成
名者尤桀驚鶴令一魁誘殺之於耀州其黨猜懼挾一
魁以叛御史謝三賓言鶴謂慶陽撫局既畢賊散遣俱

盡中部之賊寧自天降疏下巡按御史吳牲覈奏牲奏

鶴主撫誤國帝怒逮鶴下獄戍袁州七年秋子嗣昌擢

宣大山西總督疏辭言臣父鶴以總督蒙譴已三年臣

何心復居此職帝優詔答之而不赦鶴罪八年冬鶴卒

於戍所嗣昌請恤帝復鶴官而不予恤鶴初以尤世祿

寧夏大捷功進兵部尚書太子少保世廕錦衣千戶十

年敘賀虎臣寧夏破賊功追加太子少傅十三年又以

甘肅叙功任一子官從弟鶚崇禎四年進士官御史有

才名擢順天巡撫京師陷南歸福王以為兵部右侍郎
總督川湖軍務

陳奇瑜字玉鉉保德州人萬厯四十四年進士除洛陽
知縣天啓二年擢禮科給事事楊漣劾魏忠賢奇瑜亦
抗疏力詆六年春由戶科左給事中出為陝西副使遷
右參政分守南陽崇禎改元加按察使職尋厯陝西左
右布政使五年擢右僉都御史代張福臻巡撫延綏時
大盜神一魁不沾泥等已殲而餘黨猶衆歲大凶民多

從賊明年五月奇瑜上疏極言廊延達鎮城千餘里饑
荒盜賊狀詔免延安慶陽田租奇瑜乃遣副將盧文善
討斬截山虎柳盜跖金翅鵬等尋遣遊擊常懷德斬薛
仁貴參政戴君恩斬一條龍金剛鑽開山鷄黑煞神人
中虎五閻王馬上飛都司賀思賢斬王登槐巡檢羅聖
楚斬馬紅狼滿天飛參政張伯鯨斬滿鶯禽黃參耀隔
溝飛守備閻士衡斬張聰樊登科樊計榮一塊鐵青背
狼穿山甲老將軍二將軍滿天星上山虎把總白士祥

斬埽地虎守備郭金城斬扒地虎括天飛守備郭太斬
跳山虎新來將就地滾小黃鶯房日兔遊擊羅世勛斬
賈總管逼上天小紅旗他將斬草上飛一隻虎一翅飛
雲裏手四天王薛紅旗獨尾狼諸渠魁略盡奇瑜乃上
疏曰流寇作難始於歲饑而成於元克之煽誘致兩郡
三路皆盜藪今未頓一兵未絕一弦禽斬頭目百七十
七人及其黨千有奇頭目既除餘黨自散向之斬木揭
竿者今且荷鋤負耒矣帝嘉之令錄有功將士以聞延

綏羣賊多解獨鑽天哨開山斧據永寧關永寧在鎮城
東前阻山下臨黃河數年不下奇瑜謂是不可以力取
乃陰簡銳士陽言總制檄發兵令賀人龍將之而西身
為後勁直抵延川俄策馬東曰視吾馬首所向潛師疾
走入山賊不虞大兵至驚潰焚其巢斬首千六百有奇
二賊俱馘分兵擊斬金翅鵬一座城獲首五百五十延
水羣盜盡平奇瑜威名著關陝於是羣盜盡萃於山西
流突河北畿南冬冰堅從澠池渡躍河南湖廣窺四川

明年廷議諸鎮撫事權不一宜設大臣統之多推薦洪承疇以承疇方督三邊不可易乃擢奇瑜兵部右侍郎兼右僉都御史總督陝西山西河南湖廣四川軍務專辦流賊奇瑜檄諸將會兵陝州先是老回回過天星滿天星闖塌天混世王五大營自楚入蜀陷夔州阻險復走還楚分為三一犯均州往河南一犯鄖陽往浙川一犯金漆坪渡河犯商南奇瑜乃馳至均州檄四巡撫會討陝西練國事駐商南遏其西北鄖陽盧象昇駐房竹

過其西河南元默駐廬氏過其東北湖廣唐暉駐南漳
過其東南奇瑜乃偕象昇督將士由竹谿至平利之烏
林關十餘戰斬千七百餘級越七日大破之七家溝賊
斬千八十餘級總兵鄧玘功為多已設伏納谿連戰斬
三百餘級至獅子山斬七百二十餘級別將楊化麟楊
世恩周任鳳楊正芳等分道擊殺賊禽其魁閻王翻山
虎等奇瑜上言楚中屢捷一時大盜幾盡其竄伏深山
者臣督鄉兵為嚮道無穴不搜楚中漸有寧宇帝嘉勞

之乃督副將劉遷等搜竹谿平利賊追至五狼河禽其
魁十二人遣參將賀人龍等追八晝夜至紫陽賊死者
萬餘人先是賊入蜀復自蜀入秦由陽平關奔鞏昌承
疇禦之秦州賊遂越兩當襲破鳳縣分為二一向漢中
取間道犯城固洋縣一由鳳縣奔寶雞汧陽於是賊在
平利洵陽間者數萬自四川入西鄉者二三萬犯城固
洋縣者又東下石泉漢陰會漢興窺商維當是時奇瑜
以湖廣賊盡鼓行而西謂賊不足平也乃遣遊擊唐通

防漢中以護藩封遣參將賀人龍劉遷夏鎬扼略陽汧
縣防賊西遁遣副將楊正芳余世任扼褒城防賊北遁
自督副將楊化麟柳國鎮等駐洋縣防賊東遁又檄練
國事盧象昇元默各守要害截賊奔逸賊見官軍肆集
大懼悉遁入興安之車廂峽諸渠魁李自成張獻忠等
咸在焉峽四山巉立中亘四十里易入難出賊誤入其
中山上居民下石擊或投以炬火山口累石塞路絕無
所得食困甚又大雨二旬弓矢盡脫馬乏芻死者過半

當是時官軍蹙之可盡殲自成等見勢絀用其黨顧君
思謀以重寶賄奇瑜左右及諸將帥偽請降奇瑜無大
計遽許之先後籍三萬六千餘人悉勞遣歸農每百人
以安撫官一護之檄所過州縣具糗糧傳送諸將無邀
撓撫事諸賊未大創降非實也既出棧道遂不受約束
盡殺安撫官五十餘人攻掠諸州縣關中大震奇瑜悔
失計乃委罪他人以自解賊初叛猝至鳳翔誘開城守
城知其詐給以縋城上殺其先登者三十六人餘譟而

去其犯實難亦為知縣李嘉彥所挫奇瑜遂劾嘉彥及

鳳翔鄉官孫鵬等撓撫局撫按官亦異心帝怒切責撫

按逮嘉彥鵬及士民五十餘人奇瑜又請敕陝西鄜陽

湖廣河南山西五巡撫各守要害有失則治諸臣罪冀

以分已過又委罪巡撫練國事國事亦被逮給事中顧

國寶劾奇瑜誤封疆詔解任候勘御史傅永淳復劾奇

瑜解隴州圍報首功不實詔除名錦衣官逮訊九年六

月謫戍邊初奇瑜官南陽唐王殺其世子欲并廢世子

子聿鍵賴奇瑜力聿鍵得為世孫後聿鍵自立於閩台
奇瑜為東閣大學士道遠未聞命卒於家元默字中象
靜海人萬厯四十七年進士除懷慶推官擢吏科給事
中魏忠賢燄方熾以鄉里欲招致之默謝不可言路承
忠賢意劾罷歸崇禎初復官厯遷太常卿六年春以僉
都御史巡撫河南流賊由均州犯河內默率左良玉湯
九州李卑鄧玘兵待境上復率九州乘雪夜薄吳城賊
營大破之嵩雒以北名城數十賊避勿敢攻奇瑜既失

李自成於車箱峽默自汝州移駐盧氏檄良王九州各
陳兵守備要害得稍寧者數月當是時賊勢張良王承
督師檄守備尚固默率諸將斬獲多賊多趨秦楚境已
分為三自潁州犯鳳陽皇陵中州所在告急八年夏默
被逮去久之得釋歸八年卒

熊文燦貴州永寧衛人萬厯三十五年進士授貴州推
官遷禮部主事厯郎中出封琉球還擢山東左參政山
西按察使山東右布政使憂歸自是徙家蘄水崇禎元

年起福建左布政使三月就拜右僉都御史巡撫其地
海上故多劇盜袁進李忠既降楊六楊七及鄭芝龍繼
起總兵官俞咨臯招六七降芝龍猖獗如故然芝龍常
敗都司洪先春釋不追獲一遊擊不殺咨臯戰敗縱之
走當事知其可撫遣使諭降之文燦至善遇芝龍使為
已用其黨李魁奇再降再叛去芝龍擊禽之海警漸息
而鍾斌又起斌初亦就撫復叛寇福州文燦設誘斌往
泉州令芝龍擊敗之既而盛之大洋斌投海死閩中屢

平巨寇皆芝龍力文燦亦敘功增秩焉五年二月擢文
燦兵部右侍郎兼右僉都御史總督兩廣軍務兼巡撫
廣東先是海寇鍾靈秀既降復叛為芝龍所禽其黨潰
入長汀轉掠江西屬邑文燦檄芝龍屢敗賊而福建有
紅夷之患海盜劉香乘之連犯閩廣沿海邑帝以責文
燦文燦不能討乃議招撫賊佯許之參政洪雲蒸長沙
人初官廣西參政嘗搜凌秀餘黨斬三十餘級盡毀其
巢文燦乃令雲蒸與副使康承祖參將夏之本張一傑

入賊舟宣諭俱被執文燦懼罪奏諸臣信賊自陷給事中朱國棟劾之詔貶秩戴罪自效八年芝龍合廣東兵擊香於田尾遠洋香脅雲蒸止兵雲蒸大呼曰我矢死報國急擊勿失遂遇害香勢蹙自焚溺死承祖等脫還賊黨千餘人詣浙江歸款海盜盡平文燦官閩廣久積貲無算厚以珍寶結中外權要謀久鎮嶺南會帝疑劉香未死且不識文燦為人遣中使假廣西采辦名往覘之既至文燦盛有所贈遺留飲十日中使喜語及中原

寇亂文燦方中酒擊案罵曰諸臣悞國耳若文燦往詎
令鼠輩至是哉中使起立曰吾非往廣西采辦也銜上
命覘公公信有當世才非公不足辦此賊文燦出不意
悔失言隨言有五難四不可中使曰吾見上自請之若
上無所吝即公不得辭矣文燦辭窮應曰諾中使還朝
果言之帝初文燦徙蘄水與邑人姚明恭為姻昵明恭
官詹事又與楊嗣昌善嗣昌握兵柄承帝眷以帝急平
賊冀得一人自助明恭因薦文燦且曰此有內援可引

也嗣昌喜遂薦之十年四月拜文燦兵部尚書兼右副都御史代王家禎總理南畿河南山西陝西湖廣四川軍務文燦拜命即請左良玉所將六千人為己軍而大募粵人及烏蠻精火器者一二千人以自護弓刀甲冑甚整次廬山謁所善僧空隱僧迎謂曰公誤矣文燦屏人問故僧曰公自度所將兵足制賊死命乎曰不能曰諸將有可屬大事當一面不煩指揮而定者乎曰未知何如也曰二者既不能當賊上特以名使公厚責望一

不效誅矣文燦却立良久曰撫之何如僧曰吾料公必
撫然流寇非海寇比公其慎之文燦去抵安慶帝所遣
中官劉元斌盧九德監勇衛營軍者亦至良玉宿將桀
驁不受文吏節制會其下與粵軍不和大詔文燦不得
已遣還南兵然良玉軍實不為用嗣昌言於帝乃以邊
將馮舉苗有才兵五千人隸馬有才敗於真陽而京營
將黃得功連破賊兵威甚振當是時嗣昌建四正六隅
之策增兵餉大半期滅賊賊頗懼及文燦至京軍屢捷

益懼文燦顧決計招降初抵安慶即遣人括張獻忠劉國能二人聽命乃益刊招降檄布通都又請盡遷民與粟閉城中賊無所掠當自退帝怒譙讓文燦嗣昌亦心非之既已任之則曲為文燦解因其請畀以畿輔山西兵各三千明年國能果降而獻忠襲據穀城會得功又大破賊舞陽馬士秀杜應金夜半降信陽城下獻忠為左良玉所創幾被禽其下饑困多散去獻忠窮蹙亦因陳洪範以降於是嗣昌議功罪絀洪承疇曹變蛟等而

稱文燦功焉已而京軍解遂平圍斬獲三千有奇時文燦在裕州馬進忠羅汝才十三家賊聚南陽文燦下令殺賊者償死賊不肯從則齎金帛酒牢犒之名曰求賊帝詔得狀曰文燦大言無實文燦恐孫傳庭出關擊賊文燦不救而嗣昌已入政府掌中樞矣九月文燦次襄陽賊分踞勛襄諸險諸將請戰文燦議分兵盧九德曰兵分則力弱一失利全軍搖矣莫若厚集其力而合擊之衆曰善乃以僉事張大經監大將左良玉陳洪範軍

以通判孔貞會監副將龍在田軍戰於雙溝大破之斬首二千餘級羅汝才惠登相率九營走均州李萬慶率三營走光固十一月京師戒嚴召洪承疇孫傳庭入衛汝才等以為討已也懼而叩太和山提督中官求撫於文燦許之處汝才及一丈青小秦王一條龍四營於鄖縣處登相及王國寧常德安楊友賢王光恩五營於均州上言臣於李萬慶賀一龍馬光玉及順天王主勦他皆主撫請赦汝才等罪授之官可之時京軍良玉軍皆

以入衛行馬士秀杜應金遂叛於許州初士秀等降良
玉以其衆處許之郊外許大州也良玉諸將寄孥與賄
馬良玉久征不歸士秀應金在文燦軍中偽請急假良
玉軍號入城夜半兵從府第出燒城南樓剗庫殺官吏
挈其貲投萬慶萬慶者賊魁射塌天也十二年三月良
玉還破降馬進忠使劉國能擊降萬慶士秀應金亦再
降順天王已前死其黨順義王為其下所殺文燦遂上
言臣兵威震懾降者接踵十三家之賊惟革左及馬光

裕三部尚稽天誅可歲月平也帝優詔報之初張獻忠之降也擁兵萬人踞穀城索十萬人餉文燦及中外要人曰與之為請官請地請關防矣獻忠列軍狀曰請備遣既而三檄其兵不應朝野知獻忠必叛也其後汝才降不肯釋甲及進忠萬慶等並降文燦以為得策謂天下且無賊也五月獻忠遂反於穀城剗汝才於房縣於是九營俱反初均州五營懼見討自疑相與歃血拒獻忠無何亦叛去帝聞變大驚削文燦官戴罪視事七月

良玉擊獻忠羅猱山敗績帝大怒命嗣昌來代嗣昌已至軍即遣使逮文燦下獄坐大辟所親姚明恭柄國而不能救也十三年十月文燦竟棄市

練國事字君豫永城人萬厯四十四年進士授沛縣知縣調山陽天啓二年徵授御史廣寧失守國事請薊州宣府大同及山東山西河南撫臣各練兵萬以壯山海聲援又請捕誅殺大同妖人又疎論魏忠賢使羣閹辱尚書鍾羽正索冬衣傷國體國事在諫垣匡救多給事

中趙興邦忠賢私人也以國事為趙南星黨劾之削籍
崇禎元年復官擢太僕少卿進右僉都御史巡撫陝西
關中頻歲饑盜賊蠭起四年正月神一元陷保安國事
遣賀虎臣援延安而身率副將張全昌連破點燈子於
中部郃陽韓城又破別部於宜君雒川降其魁李應鰲
諸將張全昌趙大允王承恩杜文煥賀虎臣等分勦賊
澄城宜川耀州白水郃陽斬首千九百有奇總督楊鶴
既受羣賊降已復相繼叛田近菴李老柴陷中部國事

偕承恩攻圍五月克之而所部亦頻失事楊鶴被徵國

事亦戴罪自贖五年紅軍友李都司等將犯平涼國事

自涇趨固原檄大帥楊嘉謨殺賊塘馬斷其偵探賊乃

走慶陽西壕嘉謨曹文詔邀擊大敗之自三月至五月

大小數十戰賊迄破滅國事免戴罪當是時關中五鎮

大帥曹文詔楊嘉謨王承恩楊麟賀虎臣各督邊軍協

討總督洪承疇尤善調度賊魁多殲餘盡走山西關中

稍靖六年冬賊既從澠池渡入盧氏明年賊遂由河南

湖廣入漢南總督陳奇瑜檄國事駐商州協勦商南盧氏賊漢南賊遂由寧羌至兩當掠鳳縣出棧道陷寶雞關中賊復熾既而奇瑜受賊降檄諸軍勿擊賊出險遂大掠鳳翔麟游寶雞扶風汧陽乾州涇陽醴泉奇瑜委罪國事以自解國事上言漢南賊盡入棧道奇瑜檄止兵臣未知所撫實數及見奇瑜疏八大王部萬三千餘人蠟子塊部萬五百餘人張妙手部九千一百餘人八大王又一部八千三百餘人臣不覺仰天長歎夫一月

內撫強寇四萬餘盡從棧道入內地食飲何自出安得無剽掠且一大帥將三千人而一賊魁反擁萬餘衆安能受紀律即藉口回籍延安州縣驟增四萬餘人安集何所合諸征勦兵不滿二萬而降賊踰四萬豈內地兵力所能支宜其連陷名城而不可救也若咎臣不堵勦則先有止兵檄矣若云賊已受撫因誤殺使人致然則未誤殺之先何為破麟游永壽今事已至此惟急調大軍致討若仍以願回原籍禁兵勿勦三秦之禍安所終

極哉疏入事已不可為遂逮下獄九年正月遣戍廣西
久之叙前功赦還復冠帶福王時召為戶部左侍郎尋
改兵部十二月加尚書仍泣侍郎事明年二月致仕未
幾卒

丁啓睿永城人萬厯四十七年進士崇禎初厯山東右
參政坐事謫陝西副使九年寧夏兵變啓睿捕斬殺巡
撫王楫者首惡六人軍中大定再遷右布政使分守關
南從巡撫孫傳庭討賊十一年冬就拜右僉都御史代

傳庭巡撫陝西歲頻旱民益為盜長武環白水長安臨
潼咸陽賊起如蝟毛十三年用督師楊嗣昌薦擢兵部
右侍郎兼右僉都御史代鄭崇儉總督陝西三邊軍務
討賊明年嗣昌死加啓睿兵部尚書改稱督師代嗣昌
盡督陝西湖廣河南四川山西及江南北諸軍仍兼總
督陝西三邊軍務賜劔敕印如嗣昌啓睿自謫河西副
使數遷皆在陝西然實庸才為督撫奉督師期會謹慎
無功過及督師任重專制即莫知為計啓睿已受命出

潼關將由承天赴嗣昌軍於荊州湖廣巡按汪承詔言
大寇在河南荆襄幸息警無煩大軍盡匿漢津船啓睿
至五日不得渡折而向鄧州州人閉門詬過內鄉長吏
閉之穽軍行荒山間割馬羸燎以野草士啗不得飽是
時李自成已陷洛陽圍開封有衆七十萬啓睿憚不敢
援聞張獻忠在光山固始間少弱乃謀於諸將曰上命
我勦豫賊此亦豫賊也遂檄左良玉破之於麻城斬首
千二百開封日告急則曰我方有事於獻忠不赴矣聞

傳宗龍將入關督秦師啓睿曰三邊已置總督矣乞帝更敕書乃更敕書宗龍辦自成九月宗龍敗歿於項城啓睿不能救賊乘勝陷南陽殺唐王開汝二郡望風下十二月自成再圍開封河南巡撫高名衡飛檄至啓睿督兵赴之避賊入城部下大淫掠總兵陳永福射自成中其左目明年正月賊解圍去啓睿之在許州也畏賊逼始赴開封離城三十里而城即破其抵開封啓門入賊乘之幾陷四月自成合羣賊復攻開封六月帝釋侯

恂於獄命督援勦諸軍救開封未至開封圍益急帝數
詔切責啓睿啓睿不得已乃大集良王虎大威楊德政
方國安之軍偕保定總督楊文岳以七月會於朱仙鎮
與賊壘相望賊衆百萬啓睿欲戰良王曰賊鋒銳未可
擊也啓睿曰圍已急必擊之諸將皆懼良王歸營即先
走諸營俱走啓睿文岳聯騎奔汝寧賊渡河逐之追奔
四百里喪馬羸七千將士數萬啓睿敕書印劍俱失事
聞詔褫職候代九月賊決馬家口河灌開封開封遂陷

乃徵下吏久之釋歸自嗣昌死二年而啓睿敗啓睿敗
又二年而明亡矣福王時啓睿夤緣馬士英充為事官
督河南勸農勦寇諸務尋以禽斬歸德偽官拜兵部尚
書加太子太保官其一子事敗脫身旋里久之卒從父
魁楚崇禎四年春以右僉都御史巡撫保定七年擢兵
部右侍郎代傳宗龍總督薊遼保定軍務九年七月畿
輔被兵魁楚坐下吏久之放還福王時起故官總督河
南湖廣兼巡撫承天德安襄陽未赴會兩廣總督沈猶

龍入為侍郎魁楚竟代其任尋加兵部尚書唐王自立於福州命以故官協理戎政靖江王亨嘉反桂林下梧州執巡撫瞿式耜魁楚檄思思參將陳邦傳等襲走之獲於桂林封魁楚平粵伯仍留鎮兩廣閩中事敗與式耜擁立桂王於肇慶進東閣大學士兼理戎政

大清兵下廣州漸迫肇慶魁楚奉王走梧州復棄之走岑溪輜重多舳艫相屬為大將李成棟追獲魁楚遂降成棟與有隙錄其家數百人殺之魁楚乞一子成棟笑

曰汝身且莫保尚求活人耶并殺之

鄭崇儉字大章寧鄉人萬厯四十四年進士授河南府推官厯濟南兵備副使崇禎初遷陝西右參政屢遷右僉都御史巡撫寧夏數敗套寇賚銀幣世廕錦衣副千戶十二年正月擢兵部右侍郎代洪承疇總督陝西三邊軍務五月張獻忠反穀城羅汝才等九營皆反興安告警總理熊文燦請救楚撫方孔炤防荆門當陽鄖撫王鰲永防江陵遠安陝撫丁啓睿蜀撫邵捷春各嚴兵

於其境而崇儉主提兵合擊時固原臨洮寧夏三總兵
左光先曹變蛟馬科隨承疇入衛柴時華中道還甘肅
徵之不應崇儉乃檄副將賀人龍李國奇等軍發西安
國奇至洛陽卒大譟剽瑞王祖國奇已擢陝西總兵官
坐停新命崇儉亦貶一秩獻忠既叛大敗左良玉軍於
房縣之羅猴山謀入陝崇儉率人龍國奇軍扼之興安
賊還走興山太平處楚蜀交是時楊嗣昌已出師入文
燦軍而代之矣先是尚書傅宗龍議令崇儉兼督蜀軍

而嗣昌亦檄秦軍入蜀崇儉乃以十三年二月率人龍國奇會良玉大敗賊於瑪瑙山獲首功千三百三十有三降賊將二十有五人獲馬羸甲仗無算是役也崇儉身在行而嗣昌遠處襄陽及論功所賜半嗣昌但增一秩復先所降一秩而已獻忠既敗竄柯家坪蜀將張令追之被圍崇儉遣兵擊走賊人龍國奇等復追敗之寒溪寺鹽井先後斬首千五百級其黨順天王一條龍一隻龍皆降崇儉軍五日三捷威名甚振以年哀乞骸骨

不許令率總兵鄭家棟還關中留人龍國奇討賊當是時獻忠竄伏興歸山中秦楚師俱集於夔諸將協心窮搜深箐千餘殘寇可盡殲崇儉既去未幾人龍軍亦自開縣譟而西歸楚師遂敗績於土地嶺蜀中由是大亂嗣昌因言崇儉撤兵太早致賊猖獗帝初以崇儉不能馭軍不悅及是命削籍以啓睿赴軍前代理而疑崇儉託疾令按臣核實明年春獻忠陷襄陽嗣昌死帝益恨崇儉不犄角平賊也逮下獄責以縱兵擅還失悞軍律

不俟秋後以五月棄市帝自即位以來誅總督七人崇
儉及袁崇煥劉策楊一鵬熊文燦范志完趙光抃也帝
憤寇日熾用法益峻功罪不假貸而疆事寢壞卒至於
亡福王時給事中李清言崇儉未失一城喪一旅因他
人巧却遂服上刑羣臣微知其寃無敢訟言者臣甚痛
之崇儉寃始白方孔炤字潛夫桐城人萬厯四十四年
進士天啓初為職方員外郎忤崔呈秀削籍崇禎元年
起故官憂歸定桐城民變還朝十一年以右僉都御史

巡撫湖廣擊賊李萬慶馬光玉羅汝才於承天八戰八捷時文燦納獻忠降處之穀城孔炤條上八議言主撫之誤不聽而陰厲士馬備戰守已而賊果叛如孔炤言賊故畏孔炤不敢東文燦乃檄孔炤防荆門當陽鰲永防江陵遠安秦蜀各嚴兵崇儉主合擊孔炤乃請專斷德黃守承天護獻陵而江漢以南責鰲永會嗣昌代文燦令孔炤仍駐當陽惠王常潤言孔炤過獻忠有來家河神通堡之捷射中賊魁馬光玉陵寢得無虞請增秩

久任章下部未奏而部將楊世恩羅安邦奉調會川沅
兵勦竹山寇兩將深入至香油坪而敗嗣昌既以孔炤
撫議異已也又忤其言中遂因事獨劾孔炤逮下詔獄
子簡討以智國變後棄家為僧號無可者也伏闕訟父
冤滕行沙堰者兩年帝為心動下議孔炤護陵寢功多
減死戍紹興久之用薦復官以右僉都御史屯田山東
河北馳至濟南復命兼理軍務督大名廣平二監司禦
賊命甫下而京師陷孔炤南奔馬阮亂政歸隱十餘年

而終先是有以陵寢失守獲重譴者為楊一鵬一鵬臨
湘人歷官大理寺丞削籍崇禎六年以兵部左侍郎拜
戶部尚書兼右僉都御史總督漕運巡撫江北四府鳳
陽軍民素疾守陵太監楊澤貪虐引賊來寇八年正月
賊遂攻陷鳳陽焚皇陵燒龍興寺燔公私邸舍二萬二
千六百五十戮中都留守朱國相指揮使程永寧等四
十有一員殺軍民數萬人先是賊漸逼江北兵部尚書
張鳳翼請救一鵬移鎮鳳陽溫體仁格其議賊驟至一

鵬在淮安遠不及救帝聞變大驚素服避殿親祭告太廟遂逮一鵬及巡按御史吳振纓守陵官澤澤先自殺一鵬棄市振纓戍邊

邵捷春字肇復侯官人萬厯四十七年進士累官稽勲郎中崇禎二年出為四川右參政分守川南撫定天全六番高楊二氏遷浙江按察使大計坐貶久之起四川副使以十年秋抵成都時秦賊已入蜀巡撫王維章總兵侯良柱悉衆北拒城中惟屯田軍及蜀府護衛軍人

情恒懼捷春啓門納鄉民避賊者中尉奉錯勾賊抵城
下捷春與御史陳廷謨禽擊奉錯而募市人起廢將固
守賊去蜀王疏其功會維章罷傳宗龍代命捷春監軍
偕總兵羅尚文擊賊明年尚文及安錦副使吳麟徵大
破賊過天星等捷春進右參政仍監軍十二年五月宗
龍入掌中樞即擢捷春右僉都御史代之時張獻忠羅
汝才已叛謀入秦秦兵扼之興安乃犯興山及蜀太平
遂窺大寧捷春遣副將王之綸方安國分道扼之國安

連破賊賊遂還入秦楚十月朔楊嗣昌誓師襄陽檄蜀
軍受節度嗣昌以楚地廣衍賊難制驅使入蜀蜀險阻
賊不得逞蹙之可全勝又慮蜀重兵扼險賊將還毒楚
調蜀精銳萬餘為已用蜀中卒自是益罷弱不足支矣
捷春憤曰令甲失一城巡撫坐今以蜀委賊是督師殺
我也爭之不能得於是汝才惠登相遂自興山遠安犯
大寧大昌獻忠亦西至太平明年二月左良玉大破獻
忠瑪瑙山他將張應元張令等復數敗之獻忠乃逃興

歸山中久之復振由汝才入寧昌故道走而西初汝才
在寧昌阻江為諸將劉貴秦良玉秦翼明楊茂選等所
拒不得渡會獻忠西遂與合貴等戰皆却賊乃渡江營
萬頃山苦桃灣其別部營紅茨崖青平砦歸巫間大震
嗣昌乃上夷陵而檄捷春扼夔門蜀大寧大昌界楚竹
溪房縣有三十二隘口嗣昌欲厚集兵力專守夔棄寧
昌散賊官軍環攻之捷春曰棄隘口不守是延賊入戶
也乃遣茂選及覃思岱等出關分守二將不相得思岱

潛殺茂選捷春令兼統其衆其衆相率去賊入隘守者
潰賊夜斬夔關將士大驚潰新寧大竹皆陷而汝才登
相越巴霧河陷開縣為鄭嘉棟賀人龍所破汝才乃與
小秦王混世王東奔而登相獨過開縣西人龍及李國
奇又西追之汝才等遁還興山屢挫會嗣昌下招降令
小秦王混世王皆降惟汝才逸去嗣昌見楚地無賊以
八月終率師入蜀於是羣賊盡萃蜀中當是時捷春提
弱卒二萬守重慶所倚惟秦良玉張令軍無何秦師譟

而西歸楚將張慶元等敗績於夔州之土地嶺於是捷
春以大昌上中下馬渡水淺地平難與持久乃扼水寨
觀音巖為第一隘以部將邵仲光守之而夜又巖三黃
嶺磨子巖魚河洞下涌諸處各分兵三四百人以守萬
元吉以兵分力弱為憂捷春不聽九月獻忠突敗仲光
軍破上馬渡元吉急檄諸將分邀之復令張奏凱屯淨
壁捷春遣二將羅洪政沈應龍為助十月獻忠突淨壁
遂陷大昌屯開縣良王令兩軍皆覆賊行則哨探止則

息馬抄糧開隘偵候不明防軍或遠離戍所賊乘隙而過無人之境嗣昌遂收斬仲光上疏劾捷春失事捷春收兵扼梁山時登相已歸正而汝才復與獻忠合以梁山河深不能渡乃自開縣西走達州捷春退保綿州扼涪江賊疾走陷劍州遂趨廣元將由間道入漢中為秦兵所扼乃復走巴西應元諸軍邀之梓潼戰小利既而劔蜀將曹志耀等力戰却之降將張一州張載福陷陣死涪江師遂潰賊屠綿州捷春歸成都賊逼成都十一

月逮捷春使者至遂以軍事付代者廖大亨而去捷春
為人清謹治蜀有惠政士民哭送者載道舟不得行競
逐散官旗蜀王為疏救不聽敕巡按御史遣官送京師
下獄論死捷春知不可脫明年八月仰藥死獄中福王
時復官贈兵部右侍郎

余應桂字二磯都昌人萬厯四十七年進士厯知武康
龍巖海澄三縣崇禎四年徵授御史劾戶部尚書畢自
嚴朋比殿試讀卷取陳于泰第一于泰者首輔周延儒

姻也劾延儒納孫元化參貂受楊鶴重賂帝方眷延儒責應桂未幾賊陷登州元化被執應桂再疏劾延儒帝怒貶三秩視事應桂引疾歸七年還朝出按湖廣居守承天捐贖鍰十餘萬募壯士繕城治器賊不敢逼獻陵帝聞而嘉之期滿命再巡一年貽贖鍰萬五千助盧象昇軍需而奏報屬城失事具以實聞帝以是知巡撫王夢尹詐而益信應桂期滿命再巡一年十年即擢應桂右僉都御史代夢尹當是時諸監司袁繼咸包鳳起高

斗樞輩已削平湖南羣賊而江北賊勢日熾諸將雖奏捷不能大創也帝命熊文燦為總理文燦主撫明年降其渠劉國能張獻忠馬進忠西走潼關馬光玉賀一龍李萬慶順義王九條龍衆十餘萬萃麻城黃安應桂諭降光玉一龍未至而遣將擊順天王等於黃福店賊遂走黃安會文燦至麻城應桂請協擊不從賊復東走江北為左良玉所遏折而走廣濟蘄水文燦檄諸道兵合擊賊於茶山賊逸於應桂所分地文燦遂劾其後期悞

軍兵部尚書楊嗣昌以應桂曾劾其父鶴也奏逮之應桂乃陳撫勦始末白已無罪而詆文燦言正月初議撫劉國能其黨李萬慶等諸大賊盡走泌陽棗陽時文燦良玉並在德安臣以為兵勢方盛宜乘此追勦而文燦調良玉諸軍盡赴信陽勦馬進忠臣謂進忠小寇勝之不武文燦不聽自此機一失賊走西而文燦東致張獻忠攻陷穀城以要撫李萬慶五部收餘燼勢復振而豫楚之患遂自文燦之愎諫貽之矣迨賊西潰之後遮飾

上聞妄報斬級其自恃所長惟火礮火攻經過州縣用夫至八百死亡載道未見其一試也且文燦辦賊之策曰先撫後勦乃茶山不效麻城又不效第見招撫之旗絡繹於道一遣使招賀一龍而使者被殺一遣使招李萬慶而餽鹽椒運魚肉與通市賊反因之焚掠未見一賊歸順也天下有如是撫法乎其一切軍需悉取於所厯之有司名曰借辦致城市空虛子遺盡絕三月至麻城民不堪淫掠欲焚其署始踉蹌而走麻城文燦壻家

也戚里如是餘可知矣三月在蘄水其兵殺鄉民報捷
民家環哭竟不敢治一兵蘄水文燦家園也鄉里如是
餘可知矣是以捷報日張寇勢愈熾十三家之賊蹂躪
南陽汝寧如履無人之境文燦駐宛汝已久調度不聞
天下有如是勦法乎獻忠在穀城招納亡命買馬置器
人人知其叵測文燦顧欲借之為前茅遣官調之非惟
不應復留解餉之官求總兵湖廣今已造浮橋跨漢水
矣文燦前既誇張而敏功後復掩匿而不報可不謂之

欺君子以總理之大柄畀之顛蹶之耄夫臣不知其可也帝不納逮至下獄初應桂貽書文燦言獻忠必反可先未發圖之其書為獻忠邏者所得獻忠騰牒鄖陽巡撫戴東旻言撫軍欲殺我東旻聞之文燦文燦再糾應桂應桂再疏辨帝亦不納應桂竟遣戍無何獻忠果反廷臣交章薦應桂十六年起應桂兵部右侍郎十月潼關陷帝召問大臣陳演言賊入關中必戀子女玉帛猶虎入陷穿應桂叱之曰壯士健馬咸出關西賊得之必

長驅橫行大臣安得面謾演股栗失色十一月督師孫傳庭戰歿命應桂兼右僉都御史往代之應桂以無兵無餉入見帝而泣帝但遣京軍千人護行給御用銀萬兩銀花四百銀牌二百蟒幣二百雜幣倍之為軍前賞功之用而已應桂既受命日夜悲疑將至山西則偽官充斥遂巡不得前帝責以逗遛奪職命新擢陝西巡撫李化熙代之化熙亦不能進也未幾京師陷應桂家居不出久之死於難

高斗樞字象先鄞人崇禎元年進士授刑部主事坐議巡撫耿如杞獄與同列四人下詔獄尋復官進員外郎五年遷荊州知府久之擢長沙兵備副使楚郡之在湖北者盡罹賊禍勢且及湖南臨藍湖湘間土寇蠭起長沙止老弱衛卒五百又遣二百戍攸縣城庫雉堞盡圯斗樞至建飛樓四十大修守具臨藍賊艘二百餘由衡湘抵城下相拒十餘日乃却去轉攻袁州遣都司陳上才躡其後賊亦解去尋擊殺亂賊劉高峰等撫定餘衆

詔錄其功巡撫陳睿謨大征臨藍寇斗樞當南面大小
十餘戰賊盡平詔賚銀幣十四年六月進按察使移守
勛陽鄖被寇且十載屬邑有六居民不數千數百里荆
榛撫治王永祚以襄陽急移師鎮之斗樞至甫六日張
獻忠自陝引而東斗樞與知府徐啓元遣遊擊王光恩
及弟光興分扼之戰頻捷賊不敢犯光恩者均州降渠
小秦王也初與張獻忠羅汝才輩為賊獻忠汝才降而
復叛均州五營懼見討自疑又以獻忠強慮為所併光

思欽衆據要害以拒獻忠居久之乃有稍稍颺去者光
思亦去已而復降光思善用其下下亦樂為之用斗樞
察其誠招入郡守當是時斗樞啓元善謀光思善戰鄖
城危而復全十五年冬李自成陷襄陽均州攻鄖陽四
日而去明年春復來攻十餘日不克乃退屯楊溪五月
斗樞召遊擊劉調元入城旬日間殺賊三千餘自成將
來攻卒不克而去乃令光思復均州調元下光化躬率
將士復穀城將襲襄陽聞孫傳廷敗旋師均州復為賊

有十七年正月自成遣將路應標等以三萬人攻鄖斗
樞遣人入均州燒其蓄積賊乏食而退當是時湖南北
十四郡皆陷獨鄖在自十五年冬撫治王永祚被逮連
命李乾德郭景昌代之路絕不能至中朝謂鄖已陷不
復設撫治十六年夏斗樞上請兵疏始知鄖存衆議即
任斗樞而陳演與之有隙乃擢啓元右僉都御史任之
加斗樞太僕少卿路阻亦不能達是年二月朝議設漢
中巡撫兼督川北軍務擢斗樞右副都御史以往朝命

亦不達至三月始聞太僕之命即以軍事付啓元七月而北都變聞并聞漢中之命地已失不可往福王立移斗樞巡撫湖廣代何騰蛟復以道路不通改用王驥斗樞皆不聞也國變後數年卒啓元光恩亦皆以功名終張任學安岳人天啓五年進士授太原知縣以才調榆次崇禎四年舉治行卓異入為御史陳蜀中私稅催科訟獄三大苦帝為飭行出視兩浙鹽法數條奏利弊八年流賊陷鳳陽詔逮巡按吳振纓命任學往代還朝復

按河南監軍討賊時羣盜縱橫而諸將縮朒不敢擊任學慨然曰事不辭難臣職也賊勢如此我輩可雍容坐鎮耶十一年二月遂上疏極詆諸將請易武階親執干戈為國平賊帝壯之下吏兵二部及都察院議諸臣以文吏無改武職者請仍以監軍御史兼總兵事帝不從命授署都督僉事為河南總兵官河南舊無總兵左良玉陳永福並以客兵備援勦至是大將特設而麾下無一官兵部乃以署鎮許定國兵授之使參將羅岱為中

軍岱健將屢著戰功任學倚以自強時熊文燦專主撫
劉國能張獻忠俱降羅汝才馬進忠李萬慶等躡中原
如故河南人據塢壁自保者數十賊悉摧破之踞息縣
光州磔人投汝水水為赤任學不能大創也進忠勢衰
佯求撫文燦及巡撫常道立許之乘間逸去事聞任學
與文燦道立並錮秩七月任學督岱等赴羅山合左良
玉軍擊汝才萬慶及紫微星順義王大敗之追奔五十
里斬首一千四百有奇獲黑虎狼滿天星賊奔遂平九

月進忠寇開封至瓦子坡岱奮擊賊盡棄輜重遁入大隗山獲其妻子其冬京師戒嚴任學入衛道謁文燦言獻忠狼子野心終為國患我以勤王為名出其不意可立縛也文燦不能用抵畿南有詔却還巡撫道立調良王兵於陝州賊乘盧氏虛遁入內鄉浙川為文燦所劾明年除道立名任學亦鐫一秩遊擊宋懷智都司孔道興再破賊陳川部將王應龍尤之龍等破賊襄城五戰皆勝副將岱與應龍懷智等復破賊葉縣十日奏八捷

帝詔所司核實已又挫賊裕州而是時總兵孫應元黃
得功統京軍討賊屢奏大捷凱旋錄功任學亦敘復二
秩尋與左良玉陳洪範蹙李萬慶於內鄉萬慶方降獻
忠已叛文燦盡調河南軍援勦獨任學留汝南川貴總
督李若星論文燦主撫之謬請復任學原官攝行大將
督察軍事不從七月獻忠合汝才自房縣西走岱偕良
玉追之良玉令岱為前鋒已隨其後至羅猴山軍乏食
賊伏兵要害岱與副將劉元捷鼓勇直上伏四起岱馬

足絀於藤抽刀斷之蹶而復進乃棄馬步鬪久之矢盡陷於賊良玉軍亦大敗事聞任學坐褫職十五年言官請起廢任學與焉未及用而卒

贊曰流賊之肆毒也禍始於楊鶴成於陳奇瑜而熾於熊文燦丁啓睿然練國事鄭崇儉先罹其罰而邵捷春俞應桂亦或死或戍疆場則勦撫乖方廟堂則賞罰不當僨師玩寇賊勢日張謂非人謀不臧實使之然乎

明史卷二百六十

欽定四庫全書

明史卷二百六十考證

楊鶴傳大吏惡聞賊

臣嚴福按明通鑑紀事大吏為

巡撫陝西都御史胡廷宴謹附考

楊鶴傳延綏兵中道逃歸甘肅兵亦譁懼誅並合於賊

臣嚴福按毛奇齡集是時西撫耿如杞以邊兵五

千勤王赴京兵部調守通又調守涿又調守昌平功
令兵到日不開糧至次日乃開而邊兵以連調三日

不得糧餒且譁如杞以譁得罪五千人哄然而歸與羣盜合延安至慶陽城堡俱陷鶴不以聞謹附考

熊文燦傳太和山提督中官

臣嚴福按明通鑑紀事

是時太和山提督中官係李維政謹附考

邵捷春傳思岱潛殺茂選

臣嚴福按綏寇紀畧言思

岱譖茂選於捷春棲春召令計事而戮之與傳中所言潛殺茂選異謹附考

余應桂傳文燦再糾應桂

臣嚴福按綏寇紀畧文燦

再糾應桂曰南中人譁傳獻忠反如應桂等流言挑
搆奈國事何上乃下其書於刑部并按之文燦知上
將以安新附必重論應桂而又慮獻忠反覆此書可
以歸獄事成則已收其功不成則應桂開其釁于是
朝士皆寃應桂而謂文燦已甚謹附考

附明史卷二百六十考證後

乾隆四十一年

賜諡諸臣

余應桂 諡忠節

